



東華錄



門 18
號 5901
卷



東華續錄

乾隆九十二

臣王先謙敬編

臣陶澐宣恭校

秋七月丁丑朔諭軍機大臣等前曾傳諭吳壇令其親身前往金壇將于時和所占于敏中原籍貲財逐一查明毋令伊家不肖族眾隱匿並查于時和如果有侵欺家產及欲令張招官承祀于氏情事卽令據實參奏交部從重治罪所降諭旨甚明該撫自能仰體朕意妥協查辦茲據大學士阿桂等查奏于時和留京族姪于錫榮並家人趙喜供稱于時和回南起身前先後裝車九輛約有大小箱四十餘隻等語又據于錫榮供于時和在京時曾向說將來要令張招官改姓于氏承祀是于時和覬覦財產託病擁貲回南屬實請旨將于時和革職等語于時和著革職于錫榮趙喜等

東華續錄
卷九十二

交部監禁再行查訊外著將此鈔寄吳壇閱看將摺內所取供詞情節逐一研訊于時和如何攤費回籍覬覦財產捏病告假各緣由秉公詳悉確審定擬具奏至于時和所有侵占于敏中財物著吳壇分晰開單進呈仍酌量分給于德裕銀二三萬兩以資養贍將此密諭吳壇一一遵照妥辦並令由驛奏覆○賞孫士毅翰林院編修○戊寅諭軍機大臣等本日吳壇奏到睢甯河工漫口情形一摺據稱當卽兼程前往親勘籌辦俾被水人民不致失所等語睢甯漫口前陳輝祖奏報時已傳諭薩載令其前往工所會辦堵築合龍各事宜此時吳壇見有交辦于時和侵占財產一案自應一手迅速妥辦不必亟亟前往工所至籌辦水災賑恤諸務此事薩載可以先行料理吳壇俟于時和一案查辦完結再往未遲至大學士于敏中所遺財產若伊生前營私不法之事已顯露卽

將伊正法查抄入官皆所應得今既完名而沒朕亦惟始終保全以存大體本無庸究治其生前之罪至于敏中財產若干昨已傳諭吳壇令其開列清單具奏並酌分銀二三萬兩給予于德裕以資養贍卽于德裕亦本非的確于敏中之孫在伊得此以奉其祀亦足矣其餘存貲財卽係于時和與張氏侵占隱匿應行歸公之件且亦非得之以正者吳壇到金壇時卽行詳查該縣有無應行辦理水利隄工城工義學等地方公務卽將此項撥辦酌派委員經理其事覈實摺奏報銷俾于敏中所存遺產仍爲本籍地方正用不致他人侵飽私橐亦甚平允也其奏摺內亦無庸聲稱入官字樣以副朕始終保全至意將此傳諭吳壇知之○戊子諭軍機大臣等據吳壇奏前往金壇查辦于時和盜占于敏中原籍貲產一案內稱據于時和家人杜喜等供稱于時和於本年四月抵家

住於伊父子文駿家於六月二十八日進京其自京運回贖物另貯一室自行封鎖俱不許伊父開看亦無銀兩衣服給與伊父當將封鎖之房開看內有銀四萬六千兩並如意銅養畫片各件及田房契券是于時和吞占于敏中贖產已屬顯然至伊父子文駿房內俱係破舊衣服並無絲毫銀兩等語是于時和串通張氏隱占于敏中贖產帶回銀兩衣物不許伊父開看亦無絲毫給與伊父子文駿其負恩昧良不孝已極伊父子文駿之物不必查辦仍行給予至于時和前已降旨革職茲據吳壇奏稱派員沿途截拏將來途次拏獲確審定案時竟將于時和發往伊犁充當苦差以爲不孝昧良者戒至太監蘇姓據稱尙未到金壇已知會潯墅揚州淮安各關留心截拏將來拏獲時訊明押帶財物屬實亦應解交內務府著總管內務府大臣嚴行治罪以爲太監託病告歸生

事不法者戒又據另摺內開于敏中自治新房一所用銀一萬兩別有花園見作義學並未修葺等語朕從前卽風聞該縣有爲于敏中蓋造花園之事何未留心究出並聞有道員爲之料理此大關繫吏治吳壇不應放過此事原籍地方官於本地顯宦竟敢公然爲之修葺房屋花園此於吏治官方所關甚大設使江蘇紳士見任山東道府州縣者卽於吳壇原籍爲之修葺房屋可乎此事吳壇何以不行查明據實具奏乃佯爲不知欲輕描淡寫希圖完案實屬不知朕恩舊習未改吳壇著傳旨申飭至另摺所稱于敏中前後置買義田一千一百餘畝用價八千餘兩養贍貧族報官有案此係義舉不宜動其餘分給于德裕贖財二三萬兩及于時和侵占銀兩留充該地方公用之處俱著遵照節次所降諭旨妥協辦理將此傳諭知之○丁酉班禪額爾德尼自後藏入覲 上

御依清曠殿召見賜坐慰問賜茶○戊戌諭六阿哥之子縣聰病故伊福晉係三寶之女尙在未婚卽來持服實屬可嘉滿洲大學士之女如此守志固理所當然但縣聰並無子嗣情殊可憫著加恩以縣聰次子給縣聰爲嗣將此旨寄與英廉轉傳諭縣聰福晉知之○永定河溢○己亥諭昨據諾穆親奏七月十三日有趙姓太監牽羊進城自稱係縣億府中官用羊隻不肯納稅反將書吏毆打撕毀告示阿桂遣家人說情私行完結等語縣億業經來至熱河其府中太監滋事阿桂係總諳達且爲縣億福晉之祖父聞此情節卽應先行具奏乃反使家人代爲關說實屬錯謬著傳諭弘暢弘鳴英廉等將應訊人犯嚴行審辦並將諾穆親原摺鈔寄阿桂閱看令其明白回奏○辛丑東河蔡家莊河溢○壬寅諭軍機大臣等國奏東省汶河因今年雨水過多水勢陡長七月十

七日又值大雨東平州戴村壩民埕被水衝漫流入大清河民田廬舍均無妨礙見在督飭道府廳州修築加椿培厚以期鞏固等語所辦均屬妥協但閱進呈圖內所畫汶水流入大清河之處殊未明晰據貼說內稱大清河由東平州經東阿等州縣至利津縣入海計長六百餘里自屬該處大河而圖內所繪大清河並無來源僅汶河戴壩分流一股遂如河源豈有六百餘里之大河如此而已乎著傳諭國泰卽另行詳晰繪圖將大清河從何發源之處貼說呈覽仍將該處見辦情形據實奏聞尋奏大清河上游來源卽係汶河古時汶水至東平之戴村卽北流與大清河會合入海自明人導汶濟運始於戴村築壩使汶水西南流至分水口入運如汶水漲溢則聽其由壩上分洩入大清河使運河不至漲漫而大清河下游兼受蘆泉浪溪八里堂三空橋五空橋錦河柳木溝

沙河中川豐濟灤水清水減水土河等十四河之水是以蜿蜒六百餘里成爲大河至汶河漫口趕緊鑿築見止有口門十餘四五日內即可完工得旨覽○顏希深卒以李本爲貴州巡撫由布政使遷○癸卯以孫永清爲貴州布政使由左副都御史遷○甲辰諭諾穆親奏繇億之太監帶羊隻進城不肯納稅反將書吏等毆打撕破告示阿桂差人說情私行完結等語當經降旨令阿桂明白回奏茲據奏稱差人說情之處實有其事殊屬非是阿桂在軍機處行走多年朕辦理庶務伊所深知豈遇此等事件朕能曲爲寬宥耶伊係滿洲首輔爲繇億福晉之祖父何可如此瞻徇阿桂應得公爵及寶石頂雙眼花翎四團龍褂金黃帶本應撤回但伊於籌辦金川一事頗著勞績朕念此施恩不從重治罪著罰公俸十年並不必在總譜達上行走

八月壬子以京師麥貴命五城米商買通倉麥運京平糶○乙卯諭大學士程景伊品行端醇老成練達歷膺部務懋著勤勞簡任綸扉正資倚畀昨因其抱恙未痊特命加意調理並屢次存問方冀速就痊愈茲聞溘逝深爲軫恤著派散秩大臣帶同侍衛十員前往奠醑所有應得卹典並著該部察例具奏尋予祭葬諡文恭○丁巳永定河漫工合龍○湖北巡撫鄭大進貢金器不納切責之○戊午諭朝鮮國王世守藩封素稱恭順歲時職貢祇慎可嘉聞遇特頒敕諭及資送歸國等事如琉球等國亦俱奉章陳謝惟朝鮮國王必備具土物附表呈進藉達悃忱向因專使遠來若令齋回徒滋跋涉是以歷次例准留作正貢以示優恤而該國王恪共職守屆應正貢時仍復備物呈獻往來煩複轉覺多一儀文我君臣推誠孚信中外一體又何必爲此繁縟之節耶今歲朕七旬

萬壽該國王具表稱賀業已宣命來使前赴行在隨朝臣一體行禮宴賚其隨表貢物此次卽行收受以伸該國王慶祝之誠嗣後除歲時慶節正貢仍聽其照例備進外其餘陳謝表章所有隨表貢物槩行停止毋庸備進副朕柔惠遠人以實不以文之至意著禮部傳諭該國王知之○庚申以直隸偏災命截漕十萬石存北倉備賑○賞給山東曹縣等三縣出借麥本銀兩免徵還○壬戌諭各省吏治自 皇考時嚴行整飭綱紀肅清至地方官與中朝顯宦交結往來尤干例禁亦曾屢降諭旨訓飭再三乃昨聞得蘇松糧道章攀桂有爲原任大學士于敏中修造房屋花園之事隨經傳諭吳壇查明覆奏茲據奏到章攀桂曾爲覓匠經理尙未出貲幫助請將章攀桂革職發往軍臺效力等語于敏中受朕深恩乃聽本省地方官逢迎爲之雇匠蓋屋若在生前必當重治其罪

今旣完名而歿姑不深究以示朕始終保全之意至章攀桂逢迎鄉宦罔顧官箴卽問擬發往軍臺亦所應得但此事尙未出貲幫助亦姑不加深究著將章攀桂革職免其發往軍臺至吳壇身任巡撫於屬員中此等營私趨勢之事不行查奏經朕聞知飭諭始行據實劾參可見官官相護習以成風不可不加懲儆吳壇著交部嚴加議處此後外省如尙有此等情事一經發覺必當嚴行治罪斷不能復如此次邀恩未減毋謂朕教之不早也將此通諭中外知之○丙寅命再截漕二十萬石存北倉備賑○己巳諭薩載見丁父憂兩江總督員缺著陳輝祖暫行署理江南河道總督員缺著李奉翰速行前往署理河東河道總督員缺著國泰暫行兼理各省督撫尙無在任守制之例卽旗員閒有一二年復令其署任者亦俟服滿方准實授但薩載在江南年久實爲南河不可少

東華總錄 卷之九十二
六
之人薩載接奉此旨著即速來京仍於百日滿後前往署理兩江總督此因一時不得其人並非令其在任守制也李奉翰著即馳赴南河辦理一切堵築事宜其東河事務亦關緊要李奉翰俟薩載到任後即回河東河道總督之任○癸酉召吳壇來京調閱鶚元為江蘇巡撫以農起為安徽巡撫調李承鄴為河南布政使以查禮為四川布政使由按察使遷○甲戌上自避暑山莊回鑾謁東陵 西陵○免經過地方本年額賦十分之三○理郡王弘曠薨遺疏聞諭今聞理郡王溘逝朕心甚為軫念著遣皇孫繇恩往奠茶酒尋予祭葬諡曰恪○以孫嘉樂為四川按察使由廣東肇羅道遷
九月丁丑軍機大臣等奏據革任河東河道總督姚立德呈請據情代奏願於南河河東等處自備資斧效力贖罪得旨姚立德著發往南河交與薩載等以河工同知差遣委用效力贖罪○戊寅

命嵇璜為文淵閣大學士兼兵部尚書蔡新為吏部尚書協辦大學士調周煌為兵部尚書以周元理為工部尚書沈初為兵部左侍郎原任禮部右侍郎○己卯蔡家莊漫口合龍○以馮光熊為江西按察使由福建汀漳龍道遷○壬午上謁 昭西陵 孝東陵 景陵至孝賢皇后陵奠酒○癸未諭公允祁前因辦理 陵寢事務未能妥協由貝子降授公爵今著加恩仍封授貝子○甲申琉球貢使蔡煥歸國歿於途命卹之○辛卯上謁 泰陵 泰東陵○睢甯縣郭家渡漫口合龍○壬辰諭國初設官分職不殊周官法制又定鼎中原參稽前代不繁不簡最為詳備其閒因革損益名異實同稽古唐虞建官惟百內有四岳百揆外有州牧侯伯奮庸熙載亮采惠疇周則監於二代立三公三孤秦漢以後為丞相為中書門下平章知政事明洪武因胡惟庸之故改丞相為大學士其

實官名雖異職守無殊惟在人主太阿不移簡用得人則雖名丞相不過承命奉行卽改稱大學士而所任非人竊弄威福嚴嵩之流非仍名大學士者乎蓋有是君方有是臣惟后克艱厥后庶臣克艱厥臣昔人言天下之安危繫乎宰相其言實似是而非也至六官卽今之六部周禮典制綦詳要亦本於唐虞司徒秩宗諸職外而督撫自秦漢以來所稱守牧節度行省卽唐虞十二牧之遺歷朝改革建置紛如難以縷數我國家文武內外官職品級載在大清會典本自秩然至於援古證今今之某官卽前某代某官又或古有今無或古無今有允宜勒定成書昭垂永久俾覽者一目了然見在編列四庫全書遺文畢集著卽派總纂總校之紀昀陸錫熊陸費墀孫士毅等悉心校覈將本朝文武內外官職階級與歷代沿襲異同之處詳稽正史博參羣籍分晰序說簡明精審毋

允毋遺其議政大臣領侍衛內大臣八旗都統護軍統領健銳火器營內務府並駐防將軍及新疆增置各官亦一體詳晰考證分門別類纂成歷代職官表一書由總裁覆覈陸續進呈候朕閱定書成後卽以此旨冠於卷首不必請序列入四庫全書刊布頒行以昭中外一統古今美備之盛因首論丞相一官餘可類推覽是編者其各顧名思義懷於天工人代兢兢業業夙夜靖共以庶幾克艱無曠之義欽哉特諭○癸巳諭前據巴延三等奏接捕沙灣菱塘等處夥盜拏獲凌大頭蓉等訊據供出沙灣之石碁汎水陸弁兵向有得受盜賊縱容出入情節實屬從來未有之事已降旨將該提督章紳革職拏問總兵副參各員嚴行參奏並令將此案各盜犯從重辦理矣此等海洋巨盜糾夥肆劫自必盤踞有年因傳諭巴延三等查明此案得受盜賊起自何時係何人任內之事

詳晰據實覆奏茲據巴延三等覆奏稱訊據各犯糾夥肆劫賄通
弁兵地保弓役縱庇各情節俱在楊景素李質穎任內等語楊景
素前任直隸總督時已聞其篋不飭與李侍堯無異甫欲查辦
而彼業已身故倖逃法網姑免深究今沙灣等處劇盜盤踞肆惡
至於如此總督之責不在刑名錢穀而在緝盜安民乃楊景素竟
置若罔聞貽害地方若不嚴加懲儆則凡任封疆者於地方諸務
廢弛一經身故即可脫然事外其何以共知炯戒乎著交薩載於
回任後查明江南有河隄城垣等項工程應需修葺辦理之處卽
罰令楊景素家屬承修以爲貪婪弛縱者戒至李質穎前覆奏摺
內稱本年春閒在廣東任內曾密傳李天培面詢情形商酌緝拏
之法嗣因調任卽赴浙江等語李質穎既查有此等盜犯並未速
行擒拏據實具奏其咎自無可辭但所稱今春密令李天培設法

緝拏因調任未及辦理如果屬實其咎尙屬有間若彼時既不嚴
行查辦經朕傳詢又復爲此飾說則其罪更大著巴延三等將李
質穎所奏各情節詳悉確查果否有實據可憑卽行據實具奏候
朕另降諭旨交部議處朕於臣工功過一秉大公至正從不設畸
重畸輕之意巴延三等查辦此案務須徹底根究毋得稍有瞻徇
李質穎摺併發○甲午總管內務府奏太監蘇常捏疾告退復敢
爲于敏中之姪于時和押帶財物南歸殊屬目無法紀應從重枷
責發遣得旨蘇常著於枷號滿日重責六十板再行發往伊犁給
與厄魯特爲奴○乙未 上還京師○丁酉諭前以督撫等呈進
貢物漸覺踵事增華屢經宣諭飭禁不啻至再至三本年萬壽節
前卽慮及王公大臣及外省督撫等不能仰體朕懷購備多品以
申慶祝因復降旨通行曉諭以期黜華崇實乃諸臣等仍不免有

誇多闕靡之習但朕七旬慶節非常年可比且因其遠道誠殷不得不酌留數件其餘槩行發還並有諭奏事處不准接遞者諸臣等諒亦共見共聞知朕意之所在矣夫內外大臣果心存忠愛惟當實心任事爲國家抒盡宣猷豈藉貢獻以爲報效在督撫等各就地方所產土物如荔支茶葉之類呈備賞賚尙屬任土作貢乃競以金玉銅甃紛紛羅列朕實厭之卽如珫瑯一種必需銅製造而成耗費銅斤亦日甚目下錢價漸昂安知非此項無益之費所致且進獻不已各督撫中甚或有藉詞巧取以爲婪索之端則流弊何所底止其所關於吏治民生甚大尤不可不力爲防禁嗣後除各省應進土貢及各鹽政關差織造等例有官項採辦物件外其內而王公大臣外而督撫毋得再有呈進如謂祝釐伸悃上下聯情俟將來朕八旬萬壽尙可俯從其常時一槩不得再有煩瀆

諸臣其共勵寅清各勤職業毋更存進奉見長之念將此通諭中外知之○己亥添設伊犁撫民同知一員

冬十月戊申安徽巡撫閔鶚元奏遵旨覈議李侍堯罪名查李侍堯以大學士辦總督事貪黷營私罪無可道惟是李侍堯歷任封疆勤幹有爲久爲中外推服可否援照八議條內議勤議能之文稍寬一綫不立決出自 聖恩得旨該部知道諭各省督撫覈議李侍堯罪名一案俱已到齊李侍堯以大學士兼管總督受恩最深乃敢營私敗檢驕縱妄行實出意料之外覈其情罪非僅如彰實之因病縱性致家人勒索供應者可比較之從前恆文良卿貪婪亂法致罹刑憲情節實約略相等惟恆文等甫任督撫卽肆意婪贓平日又無出力辦事之處李侍堯則身任總督二十餘年如辦理暹羅頗合機宜緝拏盜案等事亦尙認真出力且其先世

李永芳於定鼎之初歸誠宣力載在旂常尤非他人所可援比是以前於尚書和珅照例定擬斬候大學士九卿請改立決時朕復降旨令督撫等各抒己見確議具題原欲以準情法之平茲各督撫大率以身在局中多請照大學士九卿所擬而閔鶚元則以李侍堯歷任封疆勤幹有爲爲中外所推服請援議勤議能之文稍寬一綫具奏是李侍堯一生之功罪原屬眾所共知諸臣中既有仍請從寬者則罪疑惟輕朕亦不肯爲己甚之事李侍堯著卽定爲應斬監候秋後處決餘著照大學士九卿原議行朕詳慎庶獄一秉大公至正從不存畸重畸輕之見若各省督撫以李侍堯暫緩刑誅輒萌徼倖苟免之見亦斷不能逃朕洞鑒也將此通諭中外知之又諭李侍堯貪縱營私各款從前查審奏到時適富勒渾前往江南行在召見朕詳加詢問據稱李侍堯歷任封疆實心體

國認真辦事爲督撫中所罕見其意以爲雖晚節不飭尚可棄瑕錄用及令各督撫覈擬罪名則富勒渾又照大學士九卿所議以卽請正法具題如果富勒渾見李侍堯平日勤幹有爲應寬一綫何妨如閔鶚元直抒所見乃於朕前旣已爲之乞恩及具題時又復隨眾從重定擬封疆大臣受朕委任深恩豈宜前後兩歧若此彼時不卽降旨交部者恐各督撫謂朕有意從寬心存迎合至陳輝祖於李侍堯罪名請仍交尚書和珅與大學士九卿覆議揆其意亦主監候但並不據見直陳作游移兩可之詞彼時閣臣卽請交部察議朕以各省題奏尙未到齊恐督撫等揣摩意旨又謂朕有意從嚴不敢各抒所見非朕降旨詢問本意是以俱批該部知道今此案罪名已定則兩人均有應得之咎不可不明白宣示富勒渾自異其說著交部嚴加議處陳輝祖游移其辭著交部察議

東華續錄 卷九十二 十一
○己酉諭楊魁見在丁憂河南巡撫員缺著雅德調補該省見有災賑事宜雅德著速赴新任其巡撫印務交尙安暫行護理陝西巡撫員缺緊要畢沅前在西安最久熟悉該處情形且守制將屆一年見在一時不得其人著前往署理並非開在任守制之例此朕用人不得已之苦衷亦天下臣民所共諒也畢沅不必來京請訓著卽馳赴新任○壬子諭川省各土司自金川底定後令其每年輪班入覲俾伸瞻就之忱本年爲朕七旬萬壽伊等情願來京隨班叩祝經提督明亮帶領前至熱河各加賞賚仍令明亮帶領分起回川茲據明亮奏稱土司等均已行抵西安天氣晴和沿途甯帖無不歡呼感悅等語此國家柔遠綏遐之道伊等目覩內地幅員之廣闊人民之富饒回歸土境自必轉相告語同心向化乃昨據嵇璜奏稱土司等此來見天朝恩賞優渥班秩尊嚴視本處

地方官漸生玩忽此慮及國家體統乎或者隱爲地方官護送有賠累乎何不明言然總所謂知其一未知其二也中國撫馭遠人全在恩威並用令其感而知畏方爲良法若如明季漢官當外藩恭順則藐忽而虐侮之或且勒索滋弊及其有事則又畏懼而調停之往往激變率由於此各土司原屬內地管轄雖有會賞一二品頂帶者其謁見地方官儀節自有一定體制如西藏班第達雖係公爵見駐藏大臣亦當跪見致敬此則中外一體分所宜然不容紊越該將軍督提等務宜隨事留心飭諭各屬於該土司等體恤固宜周至而等威亦不可陵替又不可蹈明季漢官陋習以期經久無弊至於護送賠累則地方大吏所司何事不宜查辦乎歷觀往代中國籌邊所以釀釁未有不由邊吏陵傲姑息綏馭失宜者此實綏靖邊隅撫馭外人之要務不特川省爲然卽直隸山陝

雲貴閩粵等省凡與邊境毗連之處各該督撫等均宜時刻留心督率文武體朕此旨永遠遵奉以昭我國家中外同仁之治將此通諭知之○甲寅諭昨因嵇璜奏稱川省土司入覲見天朝恩賞優渥班秩尊嚴恐視本處地方官漸生玩忽殊未喻朕柔遠綏遐之道已明降諭旨揆嵇璜之意或因地方官應付賠累起見果爾何不明言且該土司等由伊土境起身前至省城一切俱係己力地方官本無應付之事若由成都至京沿途又有額設驛站其支給分例俱准開銷官項况又分起行走並不至用逾定額該地方官有何賠累若伊等支應供給有心糜費並任聽家人胥役浮冒開銷亦其自取督撫等何難據實查辦而轉以賠累為辭乎因思土爾扈特及回城伯克來京亦未必無此等浮議亦當一槩令其不來朝謁乎蓋此皆由各驛站馬匹本不敷定額並多疲瘦不堪

應用者一遇差務稍多卽形支絀轉藉口於供應賠累以飾其剋減驛站馬乾之咎實為外省惡習朕屢降諭旨嚴切飭禁但恐地方官視為具文不知悛改著再明切申諭各督撫嚴飭管驛大小各員務期馬匹足額臚壯如有短少疲瘦立即嚴參示儆若二三年後朕特派大臣往查仍有此等情弊惟該督撫是問且必重治管驛官之罪不能稍為寬貸也將此通諭知之○乙卯以景祿為廣東按察使由郎中遷○戊午諭據喀甯阿奏太原府教授梁減奉部籤升福建安溪縣知縣但驗看該員才識迂緩難膺民社不敢因其已經推升率行送部請將梁減仍留教授原任一摺已批該部知道矣前因袁守侗奏請將交安縣知縣資原庚改教朕因資原庚係在教職任內由本班截取經該撫給咨赴選得缺何至到任甫經數月卽被參劾是以降旨敕部按照年限酌定處分所以慎

重民社而又各量其年力也但慮督撫等因有此旨認真辦理或
有意從嚴亦未可知而熱中者轉不足以服其心嗣後此等截取
教職如有經督撫奏明不勝民社而該員不甘廢棄情願送部引
見者俱著照大計八法之例准其給咨送部引見庶督撫等不至
屈抑人材而教職等亦無從藉口著爲令○庚申賜黃瑞等四十
二人武進士及第出身有差○丙寅 上臨九公主第視疾○庚
午諭軍機大臣等據伊齡阿奏接奉諭旨令楊景素家屬承修河
隄城垣等事督臣薩載回任尙需時日恐伊子聞信隱寄豫滋弊
竇當卽委員會同總商詳確訪查正在查辦聞見據伊子楊炤將
在籍金銀等項一應房產田地及在京各處所有產業並出借銀
兩連鹽引窩價約共值銀三十三萬餘兩一併另行開單稟呈等
語前因恐楊景素家屬有隱匿寄頓之事已傳諭伊齡阿留心查

察伊齡阿尙未接奉此旨卽能嚴密訪查所辦具見實心任事但
楊景素前在總督任內雖有篋篋不飭情事係伊身後漸次昭著
亦無贓款實蹟與貪黷營私敗露於生前者情罪尙屬有間且伊
子楊炤聞信後卽將所有產業據實和盤托出尙屬具有天良著
加恩將伊家產內酌量撥給三四萬兩俾資養贍其餘呈出之項
著交陳輝祖伊齡阿分別估變以備高家堰等處工程之用其有
應行解京者卽著解京並已就近諭知薩載矣將此由四百里諭
令知之

十一月乙亥朔 上臨九公主第視疾○己卯諭汪圻前於餽送
李侍堯銀兩案內擬發新疆朕本意以其究因李侍堯婪索營私
所致若果安靜到京尙可如孫士毅之加恩寬其遠發之罪乃伊
曾任臬司大員押解進京有違定例私自船行探視家口實屬知

法犯法經刑部擬以絞候自係罪所應得但覈其情罪明年秋審時九卿固必列入情實亦尙不至予句伊轉得安坐京城囹圄免致遠發雖曰罪之其實惠之汪圻著竟照原擬發往伊犁自備資斧永遠充當苦差○庚辰諭刑部議駁原任江蘇巡撫吳壇審題倪顧氏逼迫伊夫倪玉自縊身死一案該撫將倪顧氏照逼夫致死例擬絞監候與例不符應將倪顧氏依毆夫至篤疾絞決律擬絞立決一本部駁甚是已如所議行矣婦之於夫猶臣之於君子之於父同列三綱所關綦重律載人子違犯教令致父母自盡者皆處以立絞豈婦之於夫竟可從輕今乃逼迫其夫致令自盡此等潑悍之婦尙可令其偷生人世乎此案倪顧氏薄待倪玉前妻之子致相吵鬧已失婦道嗣倪玉見伊子常受單寒欲給錢營生顧氏又與爭毆以致倪玉氣忿情急自縊殞命兇悍如此該撫僅

擬絞候豈明刑弼教之意乎律既載妻毆夫至篤疾者絞決本屬允當乃例又載妻妾逼迫夫致死者比依妻毆夫至篤疾律擬絞奏請定奪之條以致引用牽混殊未妥協著交刑部將此例另行妥議改正通行此案係吳壇審擬具題吳壇在刑部司員任內辦理案件最爲諳練不應援引失當若此使其尙在必將伊交部嚴議此案失於寬縱殊屬非是塔琦著傳旨嚴行申飭並將此通諭知之○停煙瘴苗疆歷俸未滿丁憂服闋人員仍發原省例○辛巳以故理恪郡王弘曉子永瓊照例襲封多羅貝勒○壬午諭慶桂已補放烏里雅蘇台將軍阿肅著調補吏部侍郎不必兼署兵部其禮部侍郎員缺著德明補授德成見已回京伊係本部侍郎可以兼管錢法堂事務福長安不必兼署工部至胡高望見在出差工部漢侍郎乏人著曹文植兼署○甲申諭烏里雅蘇台將軍

東洋經錄 卷之九十一
原為征討準噶爾設立彼時將軍係公傅爾丹順承郡王錫保平郡王福彭其後軍務停止以六額駙原屬副將軍卽令為左副將軍至成衮扎布車布登扎布等或以人材去得勞績可嘉節次補授並非世襲之職也今烏里雅蘇台將軍員缺業已補放慶桂但思將軍新易而朕又特降諭旨令將軍參贊不必辦理喀爾喀遊牧事務則將軍參贊及四部落盟長各有專辦事件其如何分別擬定條例俾不至瞻顧誤事亦不至越畔營私久遠奉行之慮著軍機大臣會同該部議奏尋奏一烏里雅蘇台將軍係辦理邊疆巡察四部落臺卡之職除尋常事件聽喀爾喀盟長自行辦理外至事關緊要及調發兵馬諸務該盟長副將軍扎薩克應統遵將軍節制違則參究一四部落副將軍及王公扎薩克等每年輪班駐紮烏里雅蘇台向例副將軍承辦四部落事件呈報將軍參贊

今將軍參贊既不管理遊牧事務其四部落輪派駐紮之王公扎薩克除照舊派駐外所有駐紮之副將軍應仍聽烏里雅蘇台將軍參贊調撥兵馬及巡察部落接設臺卡等務不必辦理遊牧一四部落盟長向例會盟辦事屬下科派馬匹牲畜餼糧等項種種浮費請嗣後如有必須會盟者先報理藩院由院示覆餘則槩令停止一賊盜人命等案該扎薩克呈該盟長報部定奪如有不秉公辦理或被人控告或經將軍等參奏照例治罪至扎薩克亦請交四部落盟長善為約束儻有擾累該盟長亦據實奏辦以示懲儆得旨依議著通行喀爾喀四部落盟長副將軍閱看將所定是否伊等意見若何之處各報部轉奏○乙酉以諾穆親為工部侍郎署兵部○辛卯諭向來各部院司員保送三庫稅差錢局坐糧廳等項每有將會經得差人員未隔數年復行保送者不知在京

滿漢司員人數本多此等得項較優之差自應令其均霑普及若
出差未久復予保送則從未得差者未免多有向隅嗣後保送此
等差使之員其已經派過者著於十年後方准再送如堂官等違
例蒙混保送經朕查出及被人參奏者卽照徇庇例議處著爲令
○壬辰諭從前內府摹刻蘭亭八柱帖流傳名蹟頒示臣工久爲
藝苑楷模茲復得端石摹刻蘭亭及圖畫詩跋各種命內廷翰林
等詳檢並將內府舊搨本逐一比對則此搨係明永樂時周王有
燉所摹至神宗時益王翊釗及其子常遷又行補刻者但歷年久
遠石刻缺略不全著內廷翰林等詳查內府所藏舊搨蘭亭圖跋
交御書處補行摹刻以臻完善其圖畫著賈全摹補刻成後仍將
流傳原委並缺略摹補緣由詳晰題識附刻於後以昭嘉惠藝林
至意○甲午命再撥通倉米三十萬石部庫銀三十萬兩交直隸

備賑○乙未諭近來善撲等屢次皆勝蒙古揆厥所由自因管理
善撲營之拉旺多爾濟扎拉豐阿均係蒙古伊等授意各該處不
將好善撲挑來見在滿洲因蒙古中無好善撲自爲滿足不肯學
習保無日久偷安之漸應派出滿洲大臣一員管理所有拉旺多
爾濟之缺卽著豐紳濟倫補授將此交理藩院通諭各蒙古知之
○辛丑諭據六阿哥繇恩阿哥奏稱巡撫喀甯阿平日並無往來
忽呈遞請安片子並送魚數尾未便收受等語阿哥等駁回甚是
喀甯阿身爲巡撫與阿哥等毫無瓜葛何必餽送雖係微物恐漸
染成風外省大臣與諸達太監等串通滋事喀甯阿著傳旨申飭
十二月丙午以楊廷樺爲福建布政使由按察使遷○丁未諭軍機大
臣等前據閩鄂元奏宜興荆溪二縣山內石質鬆脆難以見方成
丈未能適用等語所奏未見實心已傳旨申飭並面諭薩載回任

實力督辦矣海塘工程所用石料原有裏外層之分所謂背後石料也若不能多購堅細石料原可酌量於頂衝處所用堅細石料以禦潮汐衝激其潮平水緩之處將裏層酌量閒用宜興荆溪石料未始不可且卽閔鶚元在吳縣太湖所採及王亶望在浙所購石料亦豈無一二石性鬆脆者乃閔鶚元竟以宜興荆溪石質綫文碎裂未能適用一奏塞責此總因鄰省事務漠不關心如越人視秦人之肥瘠實屬非是著再傳諭閔鶚元務須痛改積習實力督率屬員認真採辦迅速趕運浙江以備海塘要工之用至王亶望等接收石料時亦當酌量情形撓搭配用使要工速竣而辦理不至掣肘將此由五百里發往並令富勒渾王亶望知之○以李慶棻爲福建按察使由汀漳龍道遷○庚戌諭朕恭閱 實錄見鰲拜以從征屢立戰功懋封公爵 聖祖仁皇帝嗣統與大臣蘇克薩哈

等爲輔政大臣並加大師是時 皇祖沖齡踐阼鰲拜受事以後卽專權自恣擅作威福因與內大臣費揚古有隙坐伊子倭赫並侍衛西住折克圖覺羅塞爾弼等以擅乘 御馬及取 御用弓矢射鹿罪俱棄市並坐費揚古怨望亦棄市並殺其子尼侃薩哈連籍其家以與其弟穆里瑪又蘇克薩哈係鰲拜姻婭亦以論事齟齬積而成仇因蘇克薩哈籍隸正白旗鰲拜欲以薊州遵化遷安諸屯莊改撥鑲黃旗而別圈民地給正白旗 詔遣大學士管戶部尙書蘇納海與直隸總督朱昌祚巡撫王登聯丈量酌易經昌祚等勘明奏請停止圈換鰲拜卽坐蘇納海以撥地遲誤昌祚等以紛更妄奏悉治棄市且以蘇納海族人英俄爾岱爲睿親王私黨令部臣盡削世職以洩其忿並以蘇克薩哈疏稱往守 陵寢得以生全之語卽誣坐以懷抱奸詐存蓄異心二十四大罪應

予磔死 皇祖鑒其枉堅不允所請鰲拜攘臂強奏累日竟予絞
決並誅其族屬又入對時輒請申禁言官不得上書陳奏時有竊
鰲拜馬者卽捕斬之並殺 御馬羣牧長 皇祖以鰲拜擅權不
法怙惡弗悛用人行政專恣妄爲文武各官欲盡出伊門下與穆
里瑪等結成黨羽凡事在家定議然後施行倚仗兇惡毀棄國典
特降諭旨嚴拏勘審並 親加鞫問情罪俱實諸王大臣擬請
正法 皇祖念其效力年久不忍加誅從寬革職籍沒同其子那
摩佛一併拘禁迨伊死後仍 念其舊勳追賜一等男令其弟孫
相繼承襲 皇考世宗憲皇帝御極後 賜鰲拜祭葬復一等公
世襲罔替是鰲拜一身之功罪載在冊籍昭然不爽朕惟大臣爲
國宣勤功銘鐘鼎尤當深自斂抑律已奉公以保全終始况輔臣
躬承 顧命翊贊機務更宜小心謙謹不可稍涉縱恣乃鰲拜當

日自恃政柄在握輒敢擅權亂法要結黨羽殘害大臣罪蹟多端
難以枚舉若非 皇祖英明剛斷立予拏究漸將跋扈難馴而政
事亦不可問至圈地一案相持不決百姓環訴失業幾致釀成大
事 皇祖不卽加誅僅予褫奪並仍給以男爵已屬格外之仁至
皇考復還公爵時因念鰲拜舊勞伊孫達福才具又尙可用是
以仍予施 恩蓋於鰲拜擅權縱恣固所熟聞至其不法款蹟如
實錄所載纍纍若此未必一一臚悉也今朕備稽事實蹟狀顯
然若不覈其功罪明示創懲在鰲拜一家之僥倖所關猶小而後
之秉鈞執政者無復知所顧忌將何以肅綱紀而杜僉邪乎所有
見襲鰲拜公爵之德生本身既無過犯且令承襲俟出缺時卽行
停襲公爵仍照 皇祖所降諭旨給予一等男爵世襲罔替已足
以示國家法外施恩舊勳之意矣至鰲拜當時所殘害諸臣中有

會以戰功得受世職爲齎拜所枉復行褫革者著各該旗詳悉查明並見在有無子孫奏聞請旨候朕酌量加恩朕辦理庶務一秉大公至正雖於已往臣工之功罪亦必追論嚴明懲奸回於既死以爲後世子孫有大臣擅權不法者戒並將此通諭中外知之○癸丑以勒保爲內閣學士由太僕寺少卿遷○甲寅命部院堂官畫題意見不合者於公所面商毋令司員展轉傳述○丁卯諭浙江海甯改建石塘以王亶望會爲浙撫且肯擔當其事因命在工督辦但伊在服中不令與地方之務此朕用人不得已之苦心屢經降旨中外共知近因王亶望與李質穎有意見不合之處茲李質穎來京召對時奏及改建石塘後柴塘土塘仍須歲修以資保護等語朕從前親閱塘工老鹽倉一帶難以下椿素所深悉但思難以下椿處所其長不過數里非數十里之柴塘皆不可下椿改石也其

餘可以下椿處所若一律改石塘豈不爲一勞永逸之計乃李質穎今有是奏此事關繫重大朕亦不能懸斷著大學士阿桂同李質穎馳驛前往會同富勒渾將李質穎王亶望所見不同之處秉公確勘據實覆奏至王亶望實丁憂之人朕因一時不得其人是以前令其馳驛回籍治喪事畢卽至浙辦理塘工原爲公務起見其家屬自應卽回本籍守制以盡私情乃據李質穎奏伊家屬仍住杭州安然聚處朕聞之爲之心動王亶望並非無力令眷屬回籍之人似此忘親越禮實於大節有虧爲大臣者如此何以表率屬員維持風教從前伊父王師品行甚正無負讀書不應有此等忘親越禮之子養心殿暖閣恭懸 皇祖聖訓有孝爲百行之首不孝之人斷不可用朕每日敬仰 天語煌煌實爲萬世準則王亶望著革職仍留塘工自備資斧效力贖罪若再不知自咎心懷怨

望不肯實心自效圖贖前愆朕必重治其罪矣至三寶以大學士
管理總督爲維持風化之首今日當面問彼乃稱實知其事亦不
以爲怪富勒渾見爲總督於此等有乖名義之事何不據實參奏
均著交部嚴加議處李質穎到浙已久亦並未奏及直待降旨詢
問始據實具陳亦著一併交部議處至科道於尋常細故往往摭
拾具奏似此爲大臣之人於名教攸關者轉更緘默不言設如有
貪酷擅權者亦將寒蟬矣國家又何藉此言官爲乎其籍隸浙省
之科道尤不應毫無見聞何以並無一人入告斯豈風聞所弗聞
乎著令該省科道等明白回奏○戊辰諭海塘工程關繫重大必
得廣集眾思以期經理妥善陳輝祖於此等事務尙能留心講習
見在薩載已回兩江總督之任所有南河總河印信暫交薩載兼
署陳輝祖俟大學士公阿桂經過清江浦時卽會同前往海塘與

富勒渾等公同履勘籌酌詳悉妥議具奏○己巳諭前據錢載奏
考證帝堯陵應在平陽不應在濮州經大學士九卿議駁該侍郎
又具摺辨奏朕已復交原議大臣再議今大學士九卿等奏請將
該侍郎所奏濮州屬虛平陽屬實之處仍毋庸議已降旨依議矣
經生論古反復辨證原所不禁但旣形之奏牘並經廷臣集議卽
不當再執成見况該侍郎奏稱黜呂不韋門下客浮說之譌夫呂
不韋卽無足取亦尙不可以人廢言况其門下客所著之書所謂
懸之國門千金不能易一字者豈能毫無足據乎且其時去古未
遠或尙有所承述今乃欲以數千年後虛揣之詞遽行翻駁有是
理乎至其覆奏大要以酈道元水經注證濮州堯陵之虛不知水
經注所稱今成陽城西有堯陵者實道元當時所親見該侍郎轉
據爲辨證尤屬自相矛盾至其覆奏內有原奏止辨堯陵之有無

未嘗敢一字涉及改祀之語該侍郎兩次具摺之意既欲考證虛實卽爲改祀起見否則又何庸如此喋喋爲耶錢載本係晚達且其事止係考古是以不加深咎若遇朝廷政治亦似此嘵嘵不已朕必重治其罪卽如明季諸臣每因遇事紛呶盈廷聚訟假公濟私始則各成門戶繼且分樹黨援以致無益於國政而國事日非不可不引爲炯戒錢載著傳旨申飭並將此通諭中外知之○壬申諭前以王亶望留辦浙江海塘工程不令家眷回籍守制而籍隸浙省之科道並無一人入告因傳旨令其明白回奏今據該科道等稱王亶望於制中眷屬聚處一事實無所聞殊屬巧辦巡撫家屬留住省城本屬人所共知本省科道何至毫無聞見昨以三寶李質穎知有此事經朕面詢卽據實具奏但其不知大義視爲故常不以爲怪已非情理若似該科道等於傳旨詢問時猶復託

詞巧辨並不各自引咎其不是更大該科道等俱著交部嚴加議處○張家油房漫工合龍○是歲朝鮮琉球來貢

--	--	--	--	--	--	--	--	--	--	--	--	--	--	--	--	--	--	--	--	--

東華續錄

臣 王先謙敬編

臣 陶澹宣恭校

乾隆四十六年辛丑春正月己卯諭蒙古中內扎薩克皆太祖
 太宗創業之初由原部落率所屬之人投誠而來屢次隨征出
 力是以表其功勳分別封為王公扎薩克皆予以世襲罔替字樣
 炳著於冊封誥命喀爾喀雖皆被準噶爾台吉噶爾丹逐出之後
 於康熙年間始行投誠然是時已同封為王公扎薩克迄今將有
 百年俱為我大清之舊屬人矣但彼原得誥冊予以世襲罔替字
 樣者少襲爵時該院必照例請裁雖原立勳封皆朕所洞悉每次
 均予以原得爵品但恐歷年愈久不及詳察其起初功績即照例
 減削使不得世受國恩實無以副朕撫育舊屬之心即使襲予原

東華錄卷之三十三 乾隆九年十一月
爵原品亦終與內扎薩克有閒並無以昭國恩一視同仁之意著
軍機大臣會同理藩院將喀爾喀王公台吉中其首先投誠錫封
及著有軍功或由原得爵品晉封並嘉獎施恩而封者徹底清查
此內有應賞給世襲罔替之處或缺出時有仍應照例請旨者又
內扎薩克喀爾喀中有遇事晉封者若經裁削其初封仍當准其
世襲均著分別妥議具奏候朕親定至青海杜爾伯特土爾扈特
和碩特回子王公扎薩克等雖屬新投誠之人非喀爾喀等可比
然朕旣一體予封亦當一體辦理並著查明定議具奏庶我大清
億萬斯年延賞伊等子孫永受恩榮於無旣也尋奏查蒙古喀爾
喀並青海杜爾伯特土爾扈特和碩特回部王公扎薩克等見遵
旨一體詳覈除業經因罪黜封者毋庸另議外所有首先投誠著
有軍功及由原爵品績著勞績晉封者均請作為世襲罔替其緣

事降等並見已照例降襲者俱照見在爵秩給與世襲罔替至因
事奮勉或供備軍需得受封爵者俟缺出時仍將降等承襲及仍
襲原爵之處臨期請旨其尋常嘉獎晉封並奏請補授者缺出時
照例減襲至扎薩克台吉業經編列旗分職司一旗請無論原封
軍功恩封奏放統係承襲已久並未降等均請作為世襲罔替俟
奉旨後臣等仍將各部落王公扎薩克等封爵原委分別繕呈請
旨添給冊誥再查蒙古汗等向止給汗冊印信未經給予世襲罔
替冊誥請將喀爾喀杜爾伯特土爾扈特各汗俱交部頒給從之
○丁酉論本月二十三日內閣進呈禮部具題壬寅年各壇
廟祭齋戒日期一本冊開正月十四日次辛祀 祈穀壇所擬甚
屬不當天子父天母地祇承之義不可稍弛從前雍正年間恭奉
皇考世宗憲皇帝諭旨以定例正月上辛若在初五日以前則

改於次辛但元旦朝賀乃朕躬之禮儀若因此而展 祈穀之期於心實有未安著於上辛行禮煌煌 聖訓實萬世不刊之論朕御極以來遇正月初三日以前上辛因必須隔年齋戒是以改用次辛其有初四日上辛亦改用次辛行禮者則因 聖母皇太后祝釐初祉朕於元辰躬率王公大臣拜賀 東朝儀節不容稍闕至明歲正月初四日上辛並非向年可比矣該部何得亦改次辛况冬至 兩郊禮成有於次日受賀者所謂禮緣義起而義以方外尤必敬以直內如謂臣下意在尊君不敢輕易朝正令典亦當備查往例具奏請旨乃禮部遽行題達何昧昧一至於此至閣臣職司票擬於此等典禮攸關之章疏何以並不細心請旨擬籤必待朕自行看出耶所有禮部堂官著交部嚴加議處大學士等著交部察議至祀典本屬吉禮而上辛 祈穀尤歲首鉅儀乃該部

必於二十三日具題閣臣亦卽於是日呈進朕雖不以此責備而諸臣疏忽若是可謂不知仰體朕懷矣所有明歲 祈穀行禮仍用上辛並著爲令將此通諭中外知之○朝鮮國王李祘遣使表賀冬至元旦二大節又奏謝恭奉恩諭並進貢方物得旨覽王奏謝知道了前經降旨所有陳謝表章隨進貢物槩令停止今該國王奉到此旨具奏稱謝復具奏恭謝加賞段匹仍各具方物隨進本不必收受但旣專使遠來仍令齋回徒滋往返若照例留作正貢該國王屆正貢之期仍似向年備物呈獻非所以示推誠而昭體恤此次貢物著收受仍加賞鞍馬絀段貂皮等物嗣後務宜恪遵前旨毋庸備進若再進必令齋回該國王其善體朕柔惠遠人以實不以文之至意○癸卯諭據阿桂等參奏杭嘉湖道王燧驕縱不法行同市儈民怨沸騰已降旨革職拏問交阿桂等嚴審矣

至富勒渾李質穎身為督撫豈竟毫無見聞乃並未據實劾奏所謂整飭吏治者安在且伊等於見辦海塘事務茫無確見在彼諒亦無用富勒渾李質穎俱著來京候旨陳輝祖向於河工事務尙能留心講習海塘修築機宜大略相同著授爲閩浙總督至福建見有富綱在彼已歷年餘陳輝祖卽在浙省督辦塘工並兼管浙江巡撫俟海塘工竣再往福建其浙江巡撫員缺屆期另行簡放所有江南河道總督員缺著李奉翰調補河東河道總督員缺著韓鏞補授卽速赴任俟過伏秋汛再來京請訓李奉翰俟韓鏞到任交代後卽速赴南河之任亦不必來京請訓其江南淮徐河道員缺著何裕城調補河庫道員缺著劉錫嘏補授

二月甲辰朔諭禮莫大乎敬 天儀莫隆於 郊祀前以禮部具題壬寅年祭祀 壇 廟各日期將 祈穀行禮改用次辛所擬

不當已明降諭旨仍用上辛矣孟春 祈穀所以迓陽氣而兆農祥考諸經傳蓋指立春以後之上辛而非元旦以後之上辛雍正年間恭奉 皇考聖諭飭禮臣定議允宜永遠遵守敬思其義若上辛在立春前舉行與乘陽之義未爲精當又上辛設在正月初三日以前則當於舊臘隔年齋戒而 太廟祫祭實爲合饗大禮卽宮中拜 神亦屬國朝定例若於齋戒期內照舊舉行於專一致敬之道似猶未協其應如何斟酌古今益臻明備並百世遵守可行之處著大學士九卿詳悉妥議具奏尋議按禮記月令孟春之月先紀迎春東郊次乃祈穀於上帝家語載孔子云啓蟄之月祈穀於上帝左傳啓蟄而郊郊而後耕公羊傳用正月上辛註云三王之郊一用夏正正月者歲首上辛猶言始新也宋史禮志云春氣初至農事方興故郊祀昊天以祈嘉穀當在建寅之月迎春

東華續錄 卷之三十三 四
之後請嗣後定以立春後所得之辛爲上辛舉行 祈穀禮如立
春後之辛尙在上年十二月內則仍用正月上辛以符歲首始新
之義至正月初四日上辛行 祈穀禮應於初一日齋戒起是日
皇上於未入齋宮之前宮中拜 神 奉先殿均可各昭誠敬
惟出宮詣 堂子行禮 皇上親詣不親詣例由禮部將可否展
期於初五日行禮之處先期奏請至御殿受賀請用初五日亦由
該部具奏則凡正月初四日係上辛行 祈穀禮原無庸改期惟
上辛在初三日以前則齋戒在隔年舊臘之內若歲暮禘祭 太
廟宮中拜 神諸大典於已入齋戒後舉行兩事同時未爲專一
致敬按郊特牲有卜郊之文宋方慤云卜郊蓋指用辛之郊而言
嗣後如上辛在正月初三以前請酌用卜郊不專用上辛之義改
於次辛行禮從之○乙巳諭朕恭閱 皇祖實錄內載雲貴總督

卞三元與張國柱李本深等合詞奏留吳三桂總管雲貴事務一
節因檢閱卞三元列傳載與張國柱等俱傾附吳逆卽當日共疏
乞留三元疏詞尤爲迫切可見三元實爲吳逆用當日 皇祖洞
燭幾先未允所請而吳逆事權遂以解退三元後見吳逆反蹟漸
露遂託言母病乞休迨削平吳逆張國柱李本深俱以從逆伏誅
而三元竟脫然事外且自乞養歸旗閱三十年及伊歿後又復邀
恩得賜祭葬並諡以恪敏夫三元本一進退無據首鼠兩端之
人在 皇祖當日或念三元際 開國之初由牧郡洊歷封疆曾
有帶兵轉餉微勞且當三桂倡亂之時伊先已告休在家因爲曲
予包容保全終始今事閱百年詳加論定不得不明白宣示以昭
彰瘴朕於臣工功罪論斷一秉至公卽如前代諸臣之懷二心以
事君者猶且另爲立傳不稍寬假况卞三元逮事 兩朝寵承

恩遇乃始則攀援黨逆力疏保留繼則抽身遠引以圖避害其居
心行事殊不可問幸而老死牖下未被顯戮已邀國家寬大之恩
若復以飾終令典永荷殊榮將何以肅綱紀而示懲勸乎所有卞
三元生前官秩及死後諡法並所得誥敕俱著追奪其祭葬碑文
並著該旗查明一併撲毀將此通諭中外知之○丙午諭朕自臨
御以來每遇 郊祀大典無不蠲潔躬承四十六年如一日今仰
荷 吳蒼眷佑壽逾古稀仍當躬親行禮而一切登降禮儀步履
究覺稍遜於前若遣官恭代非朕勤於躬親昭事之初心而勉強
將事復於精一疑承之意轉有未盡因諭該部前往敬視 祈穀
宿齋宮詣 壇瞻拜日降輦處茲據福隆安等奏請擬由 皇乾
殿西墻門外降輿較爲近便等語應如所奏交各該衙門遵照辦
理此朕仰體 上天眷愛朕躬長申寅恪之意將來朕子孫繼緒

疑庶有壽登古稀者亦可欽承朕志於 郊壇大祀歲歲躬行率
由此典以上邀 皇天眷顧之隆庶幾無疆惟庶永膺 昊貺垂
裕萬年將此通諭中外知之○己酉 上御經筵○丙辰諭據四
庫全書總裁奏進所辦總目提要內請於經史子集各部冠以
聖義 聖謨等六門恭載 列聖欽定諸書及朕御製御批各種
所擬殊屬芴繁從前開館之初曾經降旨以四庫全書內惟集部
應以本朝 御製詩文集冠首至經史子三部仍照例編次不必
全以本朝官書爲首今若於每部內又特標 聖義諸名目雖爲
尊崇起見未免又多增義例朕意如 列聖御纂諸經列於各本
經諸家之前 御批通鑑綱目等書列於各家編年諸書之前
五朝聖訓 硃批諭旨方略等書列於詔令諸門之前 御注道
德經列於各家所注道德經之前其他以類做照編次俾尊崇之

義與編纂之體並行不悖至閱其總目特載朕前後修書諭旨及御題四庫諸書詩文爲卷首所辦未爲盡協四庫全書體大物博將來書成之日篇帙浩繁舉何爲序所有歷次所降諭旨列之總目首卷以當序事屬可行且官撰諸書亦有以諭旨代弁言者自不得不如此辦理至題四庫諸書詩文若亦另編卷首將來排列轉在 列朝欽定諸書之前心尤未安雖纂校諸臣尊君之意然竟似四庫全書之輯端爲朕詩文而設者然朕不爲也著將所進詩文六卷撤出仍分列入朕御製詩文集內俾各爲卷首則編排在 列朝欽定諸書之後而四庫書內朕所題各書詩文列在本集首卷庶眉目清而開帙了然將此諭令館臣遵照辦理○丁巳禮部議准陝甘總督勒爾謹奏秦州舊有太昊伏羲氏廟請照前代帝王陵廟守吏春秋二仲致祭例每歲額設祭銀並廟戶二名

從之○戊午諭昨據四庫全書總裁奏進總目請於經史子集各部冠以 聖義 聖謨等六門業經降旨令將 列朝御纂 御批 御製各書分列各家著撰之前不必特標名目並令將卷首所錄御題四庫諸書詩文撤出分列御製詩文各集之前所以示大公也朕一再思維四庫全書之輯廣搜博採彙萃羣書用以昭垂久遠公之天下萬世如經部易類以子夏易傳冠首實爲說易家最古之書允宜弁冕義經若以 欽定諸書列於各代之前雖爲纂修諸臣尊崇本朝起見而於編排體例究屬未協况經史子集各部內尙有前代帝王論著以本朝 欽定各書冠之亦有未合在編輯諸臣自不敢輕議及此朕則筆削權衡務求精當使綱舉目張體裁醇備足爲萬世法程卽後之好爲論辨者亦無從置議方爲盡善所有四庫全書經史子集各部俱著各按撰述人代

先後依次編纂至我朝 欽定各書仍各按門目分冠本朝著錄
諸家之上則體例精嚴而名義亦秩然不紊稱朕折衷詳慎之至
意將此通諭知之○己未諭前以阿桂等參奏杭嘉湖道王燧劣
蹟種種民怨沸騰已降旨革職拏問並據阿桂等查抄王燧贖產
多至二十餘萬兩又阿桂等參奏已故知府陳虞盛係與王燧上
年一同總辦差務之員亦曾在杭州嘉興買房產屢經傳諭阿桂
等嚴訊伊等贖產從何得來切實根究矣上年南巡時經過江南
各水管何係倣照上屆規制不過略加修整及添修古蹟一處朕
已覺其不妥即傳旨給還原主及一入浙江首站則屋宇倍增並
多點綴隨面飭三寶王亶望不應如此繁費殊非朕省方問俗之
意據奏係陳虞盛實心要好自捐養廉未便阻止彼時雖成事不
說而朕心實踏蹶不安曾有御製駐浙江水營詩言其事比至杭

州則添設座落更多今據阿桂等查辦情形則是王燧陳虞盛竟
藉辦差爲名肆意侵蝕外博見長之巧陰遂貪縱之私且其平日
必有賂剝民膏劣蹟以致天理昭彰因事敗露大約此事皆王亶
望主張三寶竟無主見墮其術中所謂無能而可憫者也王亶望
已於留眷在杭一事革職留工自效其辦差之有無染指俟阿桂
審明自有定罪三寶見亦革去戴翎暫予從寬留任至富勒渾李
質穎於王燧陳虞盛藉差貪冒之事雖然到任未久但不能查出
參奏且於王亶望忘親越禮大節有虧竟視爲泛常恬不知怪實
屬咎無可辭是以一併革去戴翎俟來京後另降諭旨至浙省科
道於此等有乖名教不行糾劾及至傳詢又復設辭巧辨其處分
原所應得但如三寶富勒渾李質穎身爲大臣尙且不知大義又
何怪科道小臣耶是以並予從寬留任朕於諸臣功過權衡悉當

總視其人之自取從不肯稍存成見如此案辦理原委不可不明
白宣示以爲中外大小臣工之戒所有御製詩著一併錄發 御
製駐浙江水營詩曰江南水營屋三間已謂不當心踏蹴浙江水
營倍過之點綴亭臺及花木爭強長此竟安窮今駐明發止一宿
未曾豫戒吾之過實不思及此豫督將求吾喜喜何曾益覺怍怍
增鞠慙○庚申諭李質穎著加恩賞給奉宸苑卿銜管理粵海關
監督事務卽赴新任不必來京請訓○以劉峩爲安徽布政使調
慶玉爲湖北按察使李慶棻爲湖南按察使以秦承恩爲福建按
察使由延建
邵道遷○甲子諭工部侍郎楊魁著馳驛前往浙江專駐海
塘工所幫同閩浙總督陳輝祖辦理塘工事務○諭軍機大臣等
據阿桂等奏勘辦浙省改建石塘一摺內稱前請做照條塊石塘
酌增工料加添丈尺以期施工易而成事速今遵旨悉心履勘通

盤籌酌修塊石塘究不如魚鱗石塘之堅固按工計料辦理魚鱗
石塘二千二百四十丈工料腳價約估銀三十餘萬兩督率工員
上緊趕辦計四十七年冬閒可以完工應如所奏辦理惟在實力
妥爲以期久安黎庶已於摺內批示至所稱老鹽倉立字號至積
字號二百餘丈不能釘樁處所應請仍留柴塘其餘一千五百丈
用椿夯打至四箇半時辰打下一丈四五尺卽不能再打沙齧椿
牢力能擊石或可一律築砌或應仍存其舊等語俟阿桂到京時
面奏亦於摺內批示又據另摺奏稱椿架一副用夫十三名每日
釘椿二根按例每椿一根銷銀五分承辦各員需幫貼銀七八錢
不等查有浙省商捐銀二十萬兩一項除造船用銀約一萬兩尙
餘銀十九萬兩懇請賞給海塘以爲釘椿夫役額外貼費毋庸造
入報銷等語自應如此辦理不然此項何用至所請毋庸報銷之

東華續錄 卷之三十三 九
處不報部可也總不奏明則不可亦於摺內詳晰批示此項商捐銀兩著卽賞給該處塘工交與陳輝祖嚴飭工員實力妥辦不許絲毫累民俾稱其值而民樂於從事敷其用而工易於告成方爲妥善且不特商捐一項卽王直望等前請認罰銀兩及王燧陳虞盛等查抄之項均應歸入塘工項下實用實銷如有餘存屆期陳輝祖另行請旨再陳輝祖以總督兼巡撫事務繁多自不能常駐工所王直望又係革職之人呼應不靈署工部侍郎楊魁久任江南於江浙情形熟悉著派往浙江專駐海塘工所幫同陳輝祖辦理海塘事務於公務較爲有益除明降諭旨外將此由六百里傳諭阿桂陳輝祖知之○乙丑 上啓鑾巡幸五臺山○免經過地方本年額賦十分之三○丙寅免順天保定等七府州屬逋賦○戊辰論文祿見在有疾著解任回京在刑部郎中上行走病痊日

另候簡用其直隸按察使員缺著郎若伊補授○己巳喀甯阿丁憂調雅德爲山西巡撫以諾穆親署河南巡撫○庚午諭軍機大臣等昨因喀甯阿丁憂已降旨令雅德調補山西巡撫諾穆親馳往豫省署理河南巡撫今思在京工部堂官無人見在止永貴一人兼署諾穆親著仍在京供職不必前往河南因思富勒渾李質穎於王直望留眷在杭及王燧陳虞盛藉差侵冒款蹟並不據實參奏實非尋常督撫失察僅止革職留任者可比是以革去戴翎令其來京候旨但念其究係到浙未久見在李質穎已加恩賞給三品卿銜辦理粵海關監督事務富勒渾並著加恩賞給三品頂帶授爲河南巡撫仍帶革職留任十年無過方准開復富勒渾卽由途次馳驛前往豫省接印任事後卽速赴五臺行在誥訓其未滿年限之前吏部不得以兼銜奏請俟十年後再行請旨開復將

此速行傳諭知之○辛未 上詣 堯母陵 帝堯廟行禮

三月甲戌朔 上幸正定府閱兵○丙子諭凡內扎薩克王公台

吉等係 太祖 太宗肇基之初各領屬人投誠著有勞績分別

錫封王公扎薩克予以世襲罔替誥冊此內有初降之無品級小

台吉等亦分賞給頭等二等台吉職銜並無世襲罔替字樣故缺

出時該院照例奏請裁汰雖每次施恩均著各襲原職但恐年久

事湮或照例裁減殊非朕體恤蒙古之意台吉均爲國初效力舊

臣卽應令其世襲罔替但此內有康熙年間因功賞給職銜者若

與國初有功台吉一例承襲未免無所區別著交理藩院嗣後辦

理世襲等事將順治年間以前國初有軍功得授台吉子嗣彙奏

承襲永著爲例以昭初降蒙古等之軍功其康熙年間以來奮勉

效力所得職銜承襲之時仍由該院照例辦理著將此旨通行曉

諭內扎薩克六盟長等處知之○丁丑諭據福康安等奏己亥運

正加八起京銅前經奏明務於四十五年內埽數開幫今加運二

起正耗等銅九十四萬九百餘解已經運員張廷泰收清卽於十

二月二十八日在瀘開幫並飭將庚子頭運一起趕運齊足定於

正月開幫等語所辦甚好滇省京銅歷任各督撫一任厥員耽延

玩誤毫無經畫以致歷年積壓今福康安等到滇未久已將己亥

運全數辦竣將來卽可趨復原限可見督撫等於地方公事盡一

分心力卽有一分功效福康安劉秉恬俱著交部議敘其承辦各

員著福康安等查明覆奏交部一體議敘○諭軍機大臣等據福

康安等奏己亥加運二起正耗京銅已於上年十二月二十八日

在瀘埽數開幫並飭將庚子頭運一起趕運齊足定於正月開幫

等語所辦甚好已明降諭旨將福康安劉秉恬交部議敘並令查

東華錄 卷之九十三
明承辦各員一體議敘矣滇省運京銅斤歷經遞壓屢多遲誤李侍堯在滇年久竟不能督辦有效伊歷任封疆數十餘年素稱老成能事而福康安則尚係年輕初任朕方以李侍堯所能辦之事福康安尚有不能斷無福康安能辦而李侍堯轉不能辦理者今福康安到滇未及一載卽已將應運京銅埽數全清可見李侍堯在滇時志得意滿竟不認真公務專以妄自尊大婪索營私以致不能實力整頓所謂有慾則不能剛也伊係受恩最重之人何竟全無天良若此著留京辦事王大臣至刑部將朕此旨傳諭李侍堯並將福康安原摺發閱看伊如何登答之處卽行據實覆奏○辛巳 上駐蹕五臺山○甲申 上回鑾○辛卯諭今日回蹕至保定有尹嘉銓遣伊子至行在奏爲伊父請諡一摺已屬狂妄易名賜諡國家大典豈可妄求而又不親來乞恩本應交部治罪因

批諭念其爲父私情姑從寬免若再不安分家居則罪無可追及次閱爲伊父請從祀 孔廟一摺更爲肆無忌憚愚而好自用矣從祀宮牆非人品學問純粹無疵久經論定者孰敢輕議是以國朝從祀寥寥甯缺無濫今尹嘉銓乃奏請欲爲湯斌范文程李光地顧八代張伯行並請從祀而廁以伊父謬妄殊甚湯斌在 皇祖時曾經侍讀理密親王乃不能盡心輔導以致理密親王縱欲敗度終於廢黜於保傅之義有虧至范文程本係明季諸生臣事我朝致身通顯雖非如洪承疇等身事兩朝可比然於純儒品節不無遺議若李光地於耿逆時遣人齎送蠟丸告變外間傳有不與陳夢雷一同列名之事於公論亦未允孚至顧八代不過通曉繙譯滿漢文義居官循謹本無行誼過人之處又張伯行雖操守廉潔亦人臣職分當然其參奏噶禮一案實因噶禮欲尋其釁勢

難兩立因先發以爲自全之計不得以其託名講學輕議入祀以上諸臣皆朕素所深悉乃尹嘉銓以休致在籍人員不知安分妄言無忌實屬從來未有之事甚至奏稱伊父尹會一蒙御製詩章褒嘉稱孝已在德行之科自可從祀等語尤爲狂吠罪不可道尹會一從前經朕賜詩獎勵原藉以風示羣倫而伊於巡撫任內亦僅循分供職後因不能勝任改用京員尙不能如湯斌等諸人可比今尹嘉銓乃敢妄稱已在德行之科既爲請諡復請從祀如此喪心病狂毫無忌憚其視朕爲何如主耶且尹嘉銓託於行孝爲此妄奏天下之人孰非人子乎使令皆爲其父求諡求入祀孔廟亦可行乎否則爲不孝卽得罪仍託於爲父則朝政不至於大紊乎此而不行治罪何以彰國憲而懲將來尹嘉銓著革去頂帶拏交刑部治罪並將朕批示其兩摺發交大學士九卿閱看並通

諭中外知之○甲午設喀爾喀杜爾伯特交界地方鄂博○乙未

以黃檢爲正藍旗漢軍副都統調達爾吉善爲直隸布政使以福

崧爲廣東布政使由甘肅按察使遷○丙申以福甯爲甘肅按察使由平慶道遷

○庚子 上還京師○辛丑陝甘總督勒爾謹奏據蘭州府循

化同知洪彬稟報廳屬撒拉爾回人蘇四十三等因爭立新教將

舊教回人殺傷數名臣隨委蘭州府知府楊士璣河州協副將新

柱前往查辦三月二十日據楊士璣稟報新柱與該府帶領兵役

前往循化十八日申刻行至白莊子被新教回匪千餘人將莊圍

住等語臣卽選派本標兵二百名帶同臬司福崧星夜往該處查

拏又奏途次據署河州知州周植稟報新教逆回於十八日晚將

知府楊士璣副將新柱殺害等語臣飛調固原涼州甘州西甯肅

州五提鎮兵共二千名星速前往仍於見帶本標兵二百名外添

調三百名兼程馳赴相機剿捕並札令提督仁和前往會辦又據
河州署都司李奇稟報已派兵二百名交署守備袁尙仁帶往該
署都司見在看守城池諭軍機大臣等回人爭教細事何至因此
殺害大員其所爭立新教係由何處流傳向來有無此等名目是
否另有希圖搶劫別情勒爾謹摺內總未明晰聲敘將來獲犯時
均應逐細審究詳悉具奏不可絲毫隱飾至勒爾謹初派本標兵
二百名原屬過少其知府楊士璣副將新柱前往查拏時辦理亦
未能妥協以致被賊殺害况知府副將係文武大員所帶官弁兵
役自復不少若因兵少不能抵禦被賊傷損者多以致知府副將
同時遇害自應據實奏聞朕必加之優卹若官弁不能督率兵役
奮力禦賊甚或兵役等畏怯先逃致領兵大員遇害則逃兵等均
應拏獲正法不可少存姑息著傳諭勒爾謹俟事定時遵照辦理

至所帶兵數前後幾及三千又札會提督仁和前往會辦仁和係
曾經出兵打仗之人軍務頗爲熟悉勒爾謹當與之和衷速辦總
以慎重明決爲要並諭仁和知之○壬寅平定兩金川方略成
御製序曰前平定金川實止受促浸一處之歸降後平定兩金川
則並促浸攢拉兩處削平之而屯戍其地不讀前方略不知予之
撫順宥過之寬惠不讀後方略不知予之保大經久之苦心兩金
川之背恩奢望屢赦屢叛與夫不得已用兵之原委亦既見之後
告成太學之碑文矣茲方略成而司事者以序請從其請是贅言
不從其請是闕體以書之有弁詞藏體例也夫示之義方之謂方
定之智略之謂略有方無略失之執有略無方失之隨二者相需
殷而相得彰且方有隅之義而象地略有包之義而象天乾圓坤
方陰靜陽動卽兵法實不出乎此要之本於敬而弗懈公而無私

泰而不驕勤而非躁然後能賞罰明而進退當緩急應而機宜合
運之九重之上示之絕域之遙忘憂不可掣肘益不可是必注精
神於董事之諸臣而念辛苦於衝鋒之策士嗚呼定方略豈易言
而成方略更難觀也今幸觀方略之成庶乎五年忘餐廢寢之勞
得以少慰而藉以解後世窮兵黷武之譏所謂伐逆不伐順伐險
不伐夷者或庶幾乎○勒爾謹奏臣行抵狄道州據兵丁李成得
報稱逆回男婦二千餘於二十一日二更時將河州守城兵殺死
擁入州城臣因所帶標兵僅五百名且狄道緊鄰河州若狄道有
失省城亦可虞因在州城屯紮俟前調兵到往勦諭軍機大臣等
此時勒爾謹帶兵無多自應持重堅守俟仁和並前調各兵陸續
到來一鼓擒滅方合機宜自不便輕易舉動至逆回本因爭立新
教致相仇殺今閱該督摺內所稱殺官抗拒占據州城之賊如係

新教首逆卽應明切曉諭舊教之人赦其互相爭殺之罪作爲前
驅令其殺賊自效如此以賊攻賊伊等本係宿仇自必踴躍爭先
既壯聲勢又省兵力而賊勢益分勦滅自易著勒爾謹與仁和相
機妥辦至河州城池堅固有文武官弁兵丁守衛何至賊匪一擁
而入將城占據其平日所爲守禦者何事所有該署都司及知州
等應查明下落如因城池失守以一死塞責尙有可原如竟苟活
潛逃卽當立正典刑以昭炯戒除另行傳諭西安提督馬彪帶兵
二千名前往協同勦捕外並令西安甯夏將軍各豫備滿兵一千
名如必須協濟該督卽一面飛調一面奏聞至健銳火器兩營尤
爲勁旅見亦挑選豫備該督與仁和務須和衷協力妥速辦理○
癸卯命阿桂馳往甘肅調度勦賊機宜

夏四月甲辰朔諭軍機大臣等本日畢沅奏逆回進逼蘭州焚燒

關廂省城眼前失事已飛札文綬等調兵會剿復札富勒渾雅德
調河南山西兵前赴西安聽調並懇迅發京兵派熟悉軍務大臣
帶領前往等語昨已傳諭阿桂令其由河南星赴甘肅今逆回如
此猖獗阿桂應卽迅速遣行見派尙書和坤額駙拉旺多爾濟領
侍衛內大臣海蘭察護軍統領額森特馳驛前往甘肅並派巴圖
魯侍衛帶健銳營兵二千名火器營兵二千名卽日分起迅速前
往如和坤等先到甘肅卽行調遣辦理俟阿桂到彼時卽交阿桂
接辦和坤仍回京供職○乙巳諭農起著賞戴花翎馳驛前赴甘
肅辦理軍需李侍堯著加恩免罪賞給三品頂帶並賞戴花翎與
副都統黃檢一體馳驛前往並著和坤傳諭黃檢卽由保定前往
不必來京○論據王廷贊奏報賊匪直抵蘭城困守兩晝夜等語
伊係文臣能如此固守若再待數日援兵一至卽可保全城池是

卽王廷贊之功深爲可嘉又奏稱賊人索取馬明心王廷贊許令
城上一見後卽行正法旣安賊匪之心又將賊首正法辦理甚合
機宜王廷贊著賞戴花翎並賞御用大荷包一對小荷包二對交
與伍彌泰等遣人齎賞王廷贊並傳旨嘉獎和坤接到此旨時亦
卽催伍彌泰馬彪所帶之兵迅速行走並將王廷贊能固守省城
先除賊首之處明晰獎諭至此次爲王廷贊齎摺出城之人亦屬
能事可嘉並著伍彌泰等查明重賞以示鼓勵○丁未以費瀆爲
山西按察使由冀甯道遷○戊申諭軍機大臣等逆回傷害職官占據
河州一案總係勒爾謹平日不能豫爲覺察以致養癰貽患及事
發後又不詳查起釁根由確實陳奏事完之日阿桂和坤必須徹
底根究實在如何貽誤之處不得稍涉含糊再王廷贊所奏安定
縣回民馬明心係新教之主則其人實爲此案首犯但究係何時

東華續錄 卷九十三
拏獲如何審辦勒爾謹從前並未陳奏殊不可解至此等回匪將
來辦理時凡隨同逞兇肆逆搶占河州圖逼省城者均應勦洗不
得稍有姑息使鄰近番人知所畏懼此爲綏靖邊方起見不得不
如此辦理至賊匪人數據勒爾謹原奏連婦女不過二千人而王
廷贊奏稱圍蘭州時有三千人蓋伊身在圍城未免爲羣言淆惑
其實逆賊既占河州必不肯捨棄自必留人占守甚或分其黨羽
侵犯狄道亦未可定焉得復有三千餘賊圍逼省城此或賊人所
過地方脅迫良民爲之先驅將來執訊時不可不分別辦理此皆
阿桂和坤到省時應行留心酌辦之事著卽先行傳諭令其存記
遵照妥辦○己酉諭據勒爾謹仁和奏署西甯鎮總兵貢楚達爾
帶領漢土官兵由循化一帶截賊人歸路收復河州擒獲逆回蘇
四十三弟姪並殲斃要犯婦女多人隨准涼州總兵德甯城守尉

額爾恆額固原鎮總兵圖欽保分路帶兵並有莊浪土司魯璠帶
領土兵陸續前抵蘭州仁和當卽令德甯額爾恆額一面把守橋
口一面直渡黃河並經打仗二次官兵奮勇殺賊甚多圖欽保並
親行殺賊四人見已將逆匪擊退上山卽日可期勦滅等語此次
仁和等會剿逆賊奮勇出力均屬可嘉仁和圖欽保德甯額爾恆
額貢楚達爾均著交部從優議敘並各賞大荷包一對小荷包二
對額爾恆額並著賞戴花翎德甯貢楚達爾如未經賞戴著一體
賞給戴用遊擊祥保瑚松阿殲擒賊犯亦屬能事均著交部從優
議敘土司魯璠亦勇往可嘉著加一等賞給職銜並賞戴花翎以
示獎勵至畢沅在陝西境內聞有甘省逆賊滋事卽能悉心調度
事事妥協並有先辦而與朕旨相合者殊屬可嘉之至著賞給一
品頂帶仍交部從優議敘並賞給大荷包一對小荷包二對布政

使王廷贊於逆賊圍逼省城時能悉力守禦且將新教首犯馬明
心先行諭示賊眾復卽正法辦理實合機宜業經賞給荷包花翎
著加恩賞一品頂帶仍交部從優議敘至此事係勒爾謹從前經
理不善以至養癰貽害其咎原無可辭但伊見在辦理收復河州
及會剿逆回尙屬迅速妥協統俟事畢後再行覈其功過另降諭
旨其陣亡都司王宗龍甚屬可憫所有應得賞卹該部照例議給
其陣亡受傷滿漢官兵及土兵等均俟查明從優議卹○丁巳勒
爾謹仁和馬彪奏臣等先後抵蘭打仗數次賊據南山各路官兵
一二日內均可齊集定期初八日進兵圍剿至逆回起釁根由緣
撒拉爾俗習回教新教欲另立門戶令舊教順從舊教不服互相
爭殺見在所謂循化土兵卽係舊教番回臣勒爾謹前在狄道與
臬司福崧詳加籌酌密飭循化文武各員妥爲駕馭俾其奮勇出

力以公報私得旨本日勒爾謹奏新舊教情形始略有端緒至今
兩教互相攻殺以破其勢朕於事發之初卽早經降旨令勒爾謹
稱前在狄道與福崧商酌令舊教土兵奮勇出力以公報私所辦
尙是但勒爾謹未必能見及此或出自福崧之贊畫至賊人占踞
山梁多至十數日何從得有口食且大兵旣經各路堵截又往何
處搶掠俱著查明覆奏總之此案起釁實在情形勒爾謹如何辦
理不善致釀事端其被擾之地方應如何加恩務須徹底詳查逐
一妥辦具奏請旨至所稱各屬官兵將次到蘭定期於初八日進
兵擒剿賊匪自應如此迅速辦理朕盼望滅賊之信甚切該督務
須速行具奏不得仍前遲緩致塵懸注○庚申諭尹嘉銓由落第
舉人用爲部屬洊歷藩司內擢京卿因其年老無用准予原品休
致伊父子兩世受恩理應感激安靜居鄉以終天年乃今春行在

竟敢令伊子齋摺爲伊父尹會一請諡又不親來乞恩卽應治罪
因念其爲父私情姑從寬免已於摺內批諭及披閱次摺又爲其
父請祀孔廟則更肆無忌憚罪不可逭因降旨將伊拏交刑部
治罪並查伊家有無狂悖不法字蹟隨據英廉袁守侗於伊京寓
及本籍查伊所著各書則其中狂妄悖謬之處不可枚舉而其尤
甚者如朋黨爲自古大患我皇考世宗憲皇帝御製朋黨論爲
世道人心計明切訓諭乃尹嘉銓竟有朋黨之說起而父師之教
衰君亦安能獨尊於上哉之語古來以講學爲名致開朋黨之漸
如明季東林諸人講學以致國是日非可爲鑒戒乃尹嘉銓反以
朋黨爲是顛倒是非顯悖聖製誠不知是何肺腸且其書又有
爲帝者師之句則竟儼然以師傅自居無論君臣大義不應如此
妄語卽以學問而論內外臣工各有公論尹嘉銓能爲朕師傅否

昔韓愈尙言自度若世無孔子不應在弟子之列尹嘉銓將以朕
爲何如主耶又其書有名臣言行錄一編將本朝大臣如高士奇
高其位蔣廷錫鄂爾泰張廷玉史貽直等悉行臚列無論此諸臣
居心行事不能及古名臣且以本朝之人標榜當代人物將來伊
等子孫恩怨卽從此起門戶亦且漸開所關朝常世教均非淺鮮
卽伊託言倣照朱子名臣言行錄朱子所處當宋朝南渡式微且
又在下位其所評薦尙皆公當今尹嘉銓乃欲於國家全盛之時
逞其私臆妄生議論變亂是非實爲莠言亂政又尹嘉銓在山東
藩司任內面求賞戴花翎且敢於朕前肖述伊妻言狀稱不得賞
卽無顏相見等語彼時伊毫不知恥而朕之深鄙其人實從此始
也然尙欲全伊顏面從未宣示廷臣昨日廷訊伊仍自述不愧此
種行徑豈講學者所宜爲耶至其託言夢中神人告以係孟子後

身當傳孔子之道又朕御製古稀說頒示中外而伊竟自號古稀
老人且欲娶年逾五十之處女爲妾所行種種乖謬出於情理之
外其他狂悖誕妄見於所著各書者尙不一而足正所謂少正卯
言僞而辨行僻而堅爲聖人所必誅者伊從前經朕屢次保全休
致回籍本可終其餘年倖逃法網乃惡積罪盈自行敗露此實天
理昭彰可爲天下盜竊虛名妄行異議者之戒連日命大學士九
卿等公同反復研鞫奏請加刑訊問朕尙未允行將伊書內狂悖
各條復加親訊伊俯首伏罪自認爲欺世盜名之小人懇求立寘
重典以彰國法等語經大學士等按律定擬奏請凌遲處死家屬
緣坐覈其情罪卽予磔誅亦所應得當此光天化日之下此種敗
類自斷不可復留尹嘉銓著加恩免其凌遲之罪改爲處絞立決
其家屬一併加恩免其緣坐此朕爲世道人心起見不得不明示

創懲以昭炯鑒凡內外大小臣工天下讀書士子均當洗心滌慮
各加敬惕引以爲戒若再有如尹嘉銓之狂悖不法一經發覺斷
不能復邀尹嘉銓之末減也將此通諭中外知之○辛酉諭尹嘉
銓所著各書內稱大學士協辦大學士爲相國夫宰相之名自明
洪武時已廢而不設其後置大學士我朝亦相沿不改然其職僅
票擬承旨非如古所謂秉鈞執政之宰相也况我朝 列聖相承
乾綱獨攬百數十年以來大學士中豈無一二行私者然總未至
擅權凱法能移主柄也大學士之於宰相雖殊其名而其職自在
如明季嚴嵩豈非大學士而其時朝政不綱竊弄威福至今稱爲
奸相可見政柄之屬與不屬不繫乎宰相大學士之名在爲人君
者之能理政與否耳爲人君者果能太阿在握威柄不移則備位
綸扉不過委蛇奉職領袖班聯如我 皇祖聖祖仁皇帝 皇考

世宗憲皇帝暨朕躬臨御四十六年以來無時不以敬天愛民勤政爲念復於何事藉爲大學士者之參贊乎卽如傅恆任大學士最久亦僅以蓋忱勤職自效今伊身後十餘年朕於庶務豈致廢而不理乎昔程子云天下之治亂繫宰相此止可就彼時朝政闕冗者而言若以國家治亂專倚宰相則爲之君者不幾如木偶旒綴乎且用宰相者非人君其誰爲之使爲人君者深居高處以天下之治亂付之宰相大不可也使爲宰相者居然以天下之治亂爲己任目無其君此尤大不可也至協辦大學士職本尙書不過如御史裏行學士裏行之類獻諛者亦稱之爲相國獻諛者已可深鄙而身爲協辦者亦儼然以相國自居不更可嗤乎從前傅恆於乾隆十三年扈從東巡因行在令其暫攝協辦事務其時直隸布政使辰垣遂以大學士稱之伊深以爲愧如此庶爲知恥識

大體之人而此外諸臣恐未必皆然矣乃尹嘉銓槩稱爲相國意在諛媚而陰邀稱譽其心實不可問至名臣之稱必其勳業能安社稷方爲無愧然社稷待名臣而安之已非國家之福况歷觀前代忠良屈指可數而奸佞則接踵不絕可見名臣之不易得矣朕以爲本朝紀綱整肅無名臣亦無奸臣何則乾綱在上不致朝廷有名臣奸臣亦社稷之福耳乃尹嘉銓竟敢標列本朝名臣言行錄妄爲臚列謬著品評若不明闕其非則將來流而爲標榜甚而爲門戶爲朋黨豈不爲國家之害清流之禍乎總之人君果能敬天愛民勤政自能庶事惟和百工熙載否則雖有賢相亦何裨政事我國家世世子孫能以朕心爲心整綱維而勤宵旰庶幾永凝 庶命垂裕萬年所謂無疆惟休亦無疆惟恤可弗懍歟將此申諭中外知之○諭昨閱尹嘉銓自著年譜載其在大理寺卿任

內與刑部籤商緩決一條夫明刑所以弼教準律定罪或輕或重
執法者惟當斟酌平允不得意爲軒輊俾犯者輸情服罪無可市
恩亦無所歸怨至問刑衙門內而法司外而地方官遇有案件自
應悉心研究彼此講論務使情眞罪當卽司官之於堂官州縣之
於府府之於臬臬司之於督撫凡有寬嚴不中之處皆許其據案
直陳若上官意涉偏私有乖允當司員等所爭果是原可不隨同
畫押或竟自行陳奏朕方將嘉其持正不阿卽外吏亦准其直揭
部科秉公定議要之皆爲公事起見不得少涉私心也夫從寬從
嚴視人之自取而寬之嚴之均無所容心於其間若議獄者不
求其平固不可而求其平之後與己原無涉也有心求平甚至自
記是出於市恩沽譽之私其可乎若朕亦欲博寬大之名將秋審
情實人犯全子免勾其爲陰德豈不更大而使國家刑章憲典竟

成虛設有是理乎昔雋不疑每錄囚還其母輒問平反幾何人歐
陽修文亦載其母述其父之言謂求生不得則死者與我無憾此
雖婦人之見然就其所言亦止爲辨明冤枉者言之耳非謂弗冤
枉者槩當從輕縱也若如尹嘉銓所載是自博寬之名而歸過他
人且以所辦公事退而私自記載以冀無識之徒妄爲稱譽其心
尙可問乎朕矜慎庶獄惟期大中至正雖匹夫匹婦之細亦必確
覈案情折衷至當若徒以姑息爲念致失情法之平乖止辟之義
朕不爲也因尹嘉銓欺世盜名妄行記載一事明切宣諭內外問
刑衙門將朕此旨各錄一通懸之公署觸目儆心共矢詳慎以臻
協中之治其懷遵毋忽○戊辰諭向來殿試新進士有至次早始
行交卷者雖伊等草茅新進對揚之始未免矜持但考試給燭最
滋弊竇至於連宵達旦則更長人倦防閑更未能周且朝考例作

四題尚不過日入完場而殿試對策一道窮日之力寫作已可從容何必焚膏繼晷始得成章乎况殿廷重地尤宜謹慎嗣後殿試交卷至遲亦以日入爲度不得仍准給燭其不能完卷者仍准列入三甲末士子等各宜自勉以副朕剔弊遴才之至意○賜錢幣等一百六十九人進士及第出身有差○己巳諭軍機大臣等本日閱和珅等所奏抵蘭後勦賊情形一摺是此半月有餘勒爾謹等之遷延觀望果不出朕之所料此事本勒爾謹辦理新舊教不善所致又平日不能實力訓練綠營兵丁以致臨事懦怯不能得用且勒爾謹安坐省署以致伍彌泰等皆逡巡推諉俾賊匪得延殘喘未能即時擒滅其罪甚大况綠營兵旣見賊即慌勢難望其得力勒爾謹等若早行奏明則派往滿兵此時亦可早抵蘭州奮同攻勦賊事豈不更速乃又以賊匪不難殲滅飾詞具奏並請停

止京兵朕亦誤聽總之自始至今錯中有錯實亦憤懣今和珅等旣打仗一次賊人因竄入窟穴死守此時惟有迅速籌辦以期勦滅淨盡又和珅奏稱老教土司韓煜甚屬奮勉並受有石傷請照土司魯璠之例酌量加恩該土司如此奮勉協力甚屬可嘉伊係四品職銜著加恩賞給三品頂帶並賞戴花翎加賞大段二匹以示鼓勵又諭本日據和珅等奏十八日督率官兵進勦逆匪殲斃百餘人逆賊竄入山洞土窟死守見在相機籌辦搜捕事宜但綠營員弁官兵不能得力請派侍衛護軍等三十員名馳往帶兵勦捕等語已諭令侍衛等迅速馳赴並添派乾清門侍衛彰霽那木扎一同馳往均於今日起程晝夜星馳著傳諭沿途各督撫卽將馬匹等項妥速豫備俾伊等到站卽行迅速進毋得稍有遲誤○庚午諭甘肅逆匪蘇四十三等肆擾不法一案係因爭立新教

舊教不從致被殺害起釁若地方官早爲嚴明料理其事當早已完結乃勒爾謹料理不善以致養癰貽患從未奏聞此事其罪已無可辭及事發之後卽當迅速妥辦以贖前愆乃朕已簡派八旗勁旅啓程前往並就近酌調阿拉善兵協剿而勒爾謹轉一味含糊且以半月之內卽可殲滅飾詞具奏致京兵等均各撤回今賊匪竄匿蘭州城外山梁幾及月餘雖節次剿捕賊匪窮蹙待斃已如釜底遊魂而見在尙未淨盡殲戮致稽時日且調往將軍提鎮等在城外督兵勦賊而勒爾謹竟安居城內衙署僅委道員駐紮城外視爲與己無涉以致眾相觀望坐失事機殊不可解朕初意本以逆匪滋事時轉不便輕易地方大吏今勒爾謹如此辦理錯謬其罪甚大難以姑容著阿桂和坤傳旨將勒爾謹革職拏交刑部治罪並派安幹章京押解送部目今卽擒勦賊匪淨盡而善後

之事正資料理因思李侍堯雖以簠簋不飭獲罪而其才實能理繁治劇陝甘總督員缺著李侍堯以三品頂帶馳驛前往管理李侍堯未到之先著阿桂暫行兼管此朕用人苦衷中外宜共諒之○諭軍機大臣等見在賊匪雖已窮極待斃但當迅速殲滅淨盡不可再稽時日因思阿桂於督兵勦捕之事經歷已多卽海蘭察額森特等皆曾在其手下呼應較靈是以從前原令和坤與阿桂相見三日後將欽差關防交阿桂接受辦理並命和坤卽行回京嗣因阿桂身有瘡疾行程不能迅速是以令和坤先行馳往今阿桂亦已行抵蘭州所有一切應辦事務俱著阿桂督辦阿桂奉到此旨卽傳諭和坤令其遵旨回京毋稍稽遲前往熱河也○壬申諭阿桂等奏查明守城打仗出力人員一摺內稱道員圖薩布永慶捐貲雇夫親身督率晝夜防禦永慶並爲賊人槍子擊落帽

頂屹然不動又副將策卜坦同王廷贊竭力守城佐領吉爾占親安礮位點放擊死賊眾數十人又烏魯木齊協領舒成佐領扎蘭布托林保於過蘭州時聞有信息情願隨同守禦打仗甚屬勇往等語圖薩布永慶策卜坦吉爾占舒成扎蘭布托林保均能奮勇宣力不愧滿洲甚屬可嘉著賞戴花翎仍交部從優議敘此外隨同出力之富甯阿等均照阿桂等所奏於事竣後分別題補交部議敘○諭王廷贊著來京陛見甘肅布政使員缺著福崧調補○諭軍機大臣等阿桂等所奏同王廷贊守城之道員等請酌量加恩見已明降諭旨但此事王廷贊始終並未奏及在伊被困時所發之摺或因倉卒未得詳敘及賊人已退奉到恩旨後自當以眾人協同出力而伊一人受恩於心有所不安據實陳請否則亦應將此情稟知勒爾謹代爲陳奏方足以鼓勵眾心而王廷贊默無

一言竟爾一人獨攘其功實屬非是而勒爾謹回省城亦竟無一言問及當問伊無暇問及者所辦何事且阿桂等奏王廷贊病體初愈精力亦疲恐不能料理周到而升任臬司福崧甚能出力莫若竟以福崧轉補於事有益見已降旨將福崧調補甘肅藩司王廷贊來京陛見藩司爲通省大員見勒爾謹如此錯誤而伊竟隨同觀望遷延誤事如此行爲恐亦尙有不可信之事且逆回滋事總督之下卽係藩司王廷贊亦豈能辭咎著傳諭阿桂將王廷贊在任所辦諸事詳細確查如有應參奏者卽據實參奏○阿桂和珅奏臣等未到蘭州聞西南關外賊匪任意往來臣阿桂抵省查各路調到官兵因無總辦之人聲勢既不聯絡紀律又不嚴整且綠營兵丁因從前賊勢猖獗時零星打仗傷亡實多見在申明軍律激勵戎行派兵自西關外從河岸迤南至山梁安設卡柵彼此

東華錄卷之三十三 乾隆九年十一月
接應又於山包上紮一大營照料各卡斷絕賊匪來路令海蘭察額森特明亮總統各營臣察看賊人所占山梁雖不甚高而坡塹陡險路徑一綫可通必須魚貫而上因飛咨四川總督文綬速飭維州協副將李天佑揀選曾經出師金川之屯練並安插降番等兵共一千名兼程遄進以備上山打仗又思賊人搶掠馬騾甚多將來鋌而走險乘騎竄逸此處兵丁能騎馬追趕殺賊者竟不能得復行文阿拉善王羅布藏多爾濟於該遊牧內擇其近蘭州者揀派七百或五百名帶赴甘省以備追捕查賊匪自據河州及焚燒省城關廂後民間財物糧食並馬騾牛驢搶掠一空足敷口食所用火藥則已裁河州鎮營舊貯原多盡爲賊有是以負固死守且習於戰鬪併命抗拒容俟熟籌勦捕機宜剋期進兵得旨逆匪起事以來實在情形直至披閱此次奏函方始詳悉端委甚屬

懋亦因此而略慰至阿桂等見在籌辦各事宜皆朕早降諭旨逐一查詢者何以從前勒爾謹全未奏及今摺內所稱該處因無總辦之人諸事渙散又各營零星散處聲勢既不聯絡紀律又不嚴整不能使賊人望而生畏等語可見眾人袖手觀望毫無料理光景不出朕之所料勒爾謹身爲總督因辦理不善致釀事端及自狄道回至蘭州見賊已擊退上山竟謂半月可以完竣而伊安坐城中衙署一切毫無籌辦且將各路已調之兵全行停止俾賊眾得以遷延時日勒爾謹之罪尚可赦乎又阿桂等奏賊人皆習於戰鬪併命抗拒賊於何處曾習戰鬪而竟不奏聞勒爾謹之罪更大甚之未經揣量賊勢之多寡強弱兵丁陸續到來不俟力齊卽催令零星打仗以致節次傷亡實多愈形畏怯兼之兵不顧將將不顧兵一遇賊匪惶遽退回太覺不成事體若京兵不令中途停

東華錄 卷之三十三
止則此時頭起已到卽所謂四川兵阿拉善兵亦已可抵蘭州乃勒爾謹輒以半月之內定能勦滅奏請撤回是勒爾謹之貽誤軍機尤爲罪在不赦今阿桂復檄調川兵一千及阿拉善兵自不得不如此辦理就見在情形而論阿桂一人儘足料理和坤不必同辦卽遵前旨回京毋稍遲延也看來阿桂於滅賊大段情形俱有節制想賊人不久卽可擒滅且官兵設卡安營賊不能復出肆掠卽從前所據之口食富足亦豈能支數月且賊人馬匹旣多困守一山草料亦易匱乏卽使宰馬爲食亦必不能支持半載阿桂惟當振作士氣俟兵力齊集剋期進剿一鼓殲滅以副朕懷○以鄭源壽爲廣東布政使出河南按察使遷

五月癸酉朔以王站住爲河南按察使出浙江糧道遷○乙亥諭昨因查抄勒爾謹家產其家人曹祿名下抄出銀一萬數千兩並有金器

等物因令軍機大臣提訊雖據該犯供稱俱係歷年在伊主任上所積門包營運生息並無別項招搖誑騙情事等語所供係一面之詞未可盡信除傳諭阿桂就近查詢外但卽以門包而論亦係陋習相沿不可不力爲飭禁督撫等養廉優厚贍身家之外一切延請幕友賞給家人等項甚屬寬裕何得任聽家人向屬員恣索門禮况督撫家人旣向屬員索取門包則司道府廳等家人勢必尤而效之以州縣官供給各上司門包力有不支勢必取之百姓如此層層剝削於吏治民生大有關係且督撫原係封鎖衙門一應親族奴僕俱例禁出入與屬員接見是以設有中軍及巡捕等官以供稽查傳稟今伊等乃仍令家人傳事以致積收門包盈千累萬所謂封鎖者安在如李侍堯勒爾謹俱經敗露而此外督撫諒俱不免特未經發覺耳若不明示禁革流弊恐無所底止卽奏

事處向有收受督撫隨封銀兩此係舊時規例相沿至今但伊等爲朕所管教若不一體裁減督撫轉有所藉口著通諭各督撫嗣後奏事處隨封銀兩俱照向例裁減一半卽向得雙分者亦止許得半分其督撫至道府槩不許收受屬員門包各督撫傳事稟話交中軍巡捕等官傳稟不許另設立管門家人致滋弊竇仍令各傳知所屬官吏一體遵照毋許一人送給再將此旨各錄一通懸之督撫署門並著於年終彙奏一次如有陽奉陰違仍蹈故轍或經科道參奏或於別事發覺則該督撫欺飾之罪不輕毋謂朕教之不早也將此通諭知之○丁丑阿桂等奏撒拉爾回民分爲十二工每工各有掌教韓哈濟係總掌教乾隆二十六年與賀麻六乎同在章哈寺念經不和賀麻六乎另造禮拜寺三座韓哈濟稟知循化廳斷令仍歸一處賀麻六乎轉以韓哈濟串通馬國寶斂

錢惑眾誘人入教等情赴臬司控告而韓哈濟又訴稱二十七年馬明心夥同楊回子夥人撒拉爾與賀麻六乎馬索南韓哈勺等妄言禍福煽惑愚民經地方官訪明將馬明心等逐出撒拉爾詎賀麻六乎等又以在章哈寺牆壁畫門爲圖妖言顯聖搖頭念經跳舞等因在臬司衙門具呈嗣經審明誣告照例擬罪並議該犯等教既有異同飭令撒拉爾十二工各舉一人充當掌教其新寺三座分開禮拜以杜爭端咨部完結此新教流傳與舊教互相仇殺緣由也至蘇四十三卽係賀麻六乎一黨撒拉爾止此一種多穿白褐翦短鬚辮營中並無此類食糧之人其在循化河州充當衙役者閒或有之本年三月內舊教回民韓哈拉勿等以蘇四十三請來安定教師馬明心韓二箇等另立新教因伊叔韓哈戶長不從互相仇殺共殺老教四十餘人等情在總督衙門控告當派

知府楊士璣副將新柱前往查拏蘇四十三約會新教之人帶鳥槍器械將楊士璣新柱戕害其時勒爾謹審出馬明心傳教滋事飭安定縣黃道與將馬明心拏獲解省此蘇四十三起釁滋事情形也查馬明心於二十七年逐回原籍後潛來撒拉爾傳經惑眾地方官並不查究致釀事端至兩教互相仇殺之後舊教至省控告時勒爾謹並不查明強弱眾寡情形即派副將帶兵前往激而生變實勒爾謹辦理不善所致再見獲逆犯馬復才各供洪濟橋唐家川六處回子均係馬明心新教徒弟爲蘇四十三紮筏渡河及蘇四十三分遣賊匪往安定會甯一帶求救見在盤獲奸細馬應高供亦相同均已分遣弁兵各處防範得旨此案起釁釀毒已久若勒爾謹早爲嚴切辦理何至構成事端乃伊竟毫無措置以致誤事不小實斷不可復留至新教逆回如此肆擾實爲罪大惡

極不可不嚴斷根株如所稱洪濟橋唐家川六處回子素與馬明心蘇四十三潛通且紮筏渡賊匪過河尤爲罪不容誅此事應於剿賊事平後趁兵威嚴整之時痛加懲治以儆兇頑不可姑息了事此皆阿桂在彼應督辦之事其餘地方善後各事宜不妨交李侍堯辦理其拏獲之馬復才等及從前已獲各犯即派員先行解京至朕爲此次逆匪之案日夜焦勞籌計於數千里外阿桂須仰體朕懷悉心督辦隨時奏聞以慰塵念○戊寅諭各省督撫管門家人有向屬員需索門包陋習而司道以下家人亦相率效尤積弊相沿不可不力爲飭禁業經明降諭旨令各督撫嚴行禁止並著於年終彙奏一次近又聞各省上司留待屬員飯食有押席銀兩一項更不應有此等陋習其事尤可鄙笑直隸自高斌罷之之後方無此事可知各省爲督撫者欺朕即位初政未查及此遂漸

無忌憚今亦不追問矣督撫等養廉優厚用度寬餘卽可道府廳等官所得分例亦不爲薄乃旣聽家人索取門包而又收受屬員押席銀兩此必督撫先開其端以致上行下效甚屬無恥實非整飭官方之道況上司屬員宴會本干例禁若藉此爲婪取屬員之地尤大不可此在巧於逢迎者必欣然樂就而無力者或轉以爲苦甚至力有不支取資百姓則更於吏治民生大有關繫自應一體嚴禁著再通飭各省督撫務率屬員一體遵照裁革俱入於年終彙奏如有陽奉陰違仍蹈故轍或經科道參奏或於別事發覺亦惟該督撫是問○己卯諭軍機大臣等昨阿桂等奏查明甘肅逆回新舊教起釁仇殺緣由一摺此等逆回在該處煽惑愚人妄言禍福甚至設立掌教及總掌教之名以致無知回民被此愚惑入教指揮聽令見在逆回蘇四十二等卽其餘黨竟敢率眾抗拒

官兵總由當日養癰貽患而致著李侍堯於辦理撒拉爾善後事宜內將總掌教名目不動聲色令其裁去並各省有無似此等回教名目者亦各一體妥爲裁革至韓哈濟與賀麻六平等爭教互訐非尋常案犯可比自當據實奏聞按律嚴辦以示懲儆乃當日該督撫僅以咨部完結刑部亦照咨率覆或入於彙奏朕實不知均屬錯誤嗣後各省督撫遇有此等邪教爭控聚眾念經之案卽應親提案犯嚴審從重究擬據實具奏以淨根株不得顛預了事率行咨部完結致復蔓延滋事刑部堂官遇有此等外省咨結之案亦卽據實特奏從重定擬不得咨覆完案至邪教案內凡有發遣之犯不得發往奉天吉林及新疆等處將邪教復行煽惑民人被其愚誘將此傳諭李侍堯及各督撫一體遵照○以呂爾昌爲安徽按察使

由山東濟東
泰武臨道遷

○戊子諭軍機大臣等向來甘省藩庫

收捐監生原因該處出產米穀較少不得不有藉捐輸以資裒益近年以來該處收捐糧石各州縣倉廩當已充足况行之日久其中轉不免弊竇地方官既經收捐監穀其幕友家人等或竟視爲利藪因緣滋弊不可不防其漸見阿桂在甘省辦理勦洗逆回諸事於該處地方利弊自當隨時體察李侍堯又新任陝甘總督監糧一事本非其所承辦自應無所迴護而地方因革事宜到任後亦當悉心體察據實奏聞况伊身獲重譴經朕加恩錄用諸事尤宜實心查辦以贖前愆更不當稍有瞻徇著傳諭阿桂會同李侍堯將該省收捐監糧有無情弊及應否停止之處據實奏聞候朕降旨○諭阿桂奏王廷贊於三月二十五日至二十九日令調到綠營兵節次打仗損折甚多亦係出於無奈尙屬過之小者至其將馬明心之子及婿放令出城予賊此則不是甚大其罪實在於

此伊於逆賊逼犯省城時既將馬明心提出示賊卽行正法何以又將其子婿放給藩司大員豈可損威失體若此阿桂和坤於此等辦理錯謬之事何不早行奏及王廷贊見有交代之事尙未能卽行起程並著阿桂先行面詢據實覆奏○己丑諭軍機大臣等據袁守侗奏吳橋縣報民人許進才妻張氏因借給鄰婦鐵鋏起釁被伊夫毆打情極手向上抓冀圖掙起適伊翁許成平走來拉勸張氏黑暗之中誤將伊翁腎囊抓傷詎許成平傷重側倒在地磕傷右腮腋移時殞命將許張氏依妻毆夫之父母致死者律凌遲處死一案朕再三詳閱情節殊未真確當許進才毆打伊妻時正值三月天氣尙寒北方鄉民二三月時尙多穿厚絮棉袴驟難抓透况許張氏旣被許進才摔地毆打伊翁卽欲勸救自應將許進才拉開不應轉拉張氏張氏被毆之際卽情極誤抓亦何至抓

透棉袴傷重移時殞命許成平彼時是否下體裸赤抑或尙穿棉袴摺內亦未聲明看來必有別故或竟係許成平有逼姦伊媳之事致被伊媳拒姦抓傷伊妻邢氏及子許進才或因許成平顏面攸關遂爾隱匿飾供此亦情理所有但愚民無知止欲爲許成平開脫遂令許張氏罪陷凌遲司讞者復不爲之細心推究致令節婦含冤莫白則大不可見已面諭刑部堂官將此情節議駁仍傳諭袁守侗親提此案人犯照依所供各情再行研訊朕於庶獄無不悉心詳究不肯使匹夫匹婦稍有枉抑袁守侗曾任刑部堂官臬司郎若伊又係刑部能事司員自應仰體朕意共矢詳慎何以於此等緊要情節俱未虛衷推究遽爾率行定擬耶○辛卯諭凡以清字緝寫地方城邑當明白分別繕寫查山海關外盛京吉林黑龍江所屬地方乃我大清發祥開基之地大半皆有清語卽金

錦二州漢字之意一緝爲鍾音州一緝爲愛辛州遼陽州緝爲遼哈安圖方合本意著軍機大臣等詳查山海關外府州縣無清語者俱取地方之意緝妥候朕閱定再行通諭遵行如克音等處無州縣字樣者印信仍增鐫以州縣字樣○癸巳諭密雲縣石匣龍神屢昭靈應宜加封號以答神庥著內閣會同禮部卽行敬謹照例辦理尋封爲昭靈廣濟龍神○諭富綱著來京陛見所有福建巡撫事務著楊魁前往暫行署理富綱俟楊魁到後再行來京○丙申諭軍機大臣等前王廷贊有奏繳積存廉俸銀四萬兩以資兵餉一摺因思王廷贊僅任甘肅藩司何以家計充裕甘省地方本爲瘠薄而藩司何以僉稱美缺若云有營私貪黷之事何以王廷贊在任多年並無聲名不好之處卽從前王直望在甘省藩司任內亦未必竟敢勒索屬員以肥己橐但王直望於捐辦

浙省海塘工程案內竟捐銀至五千兩之多伊在浙未久其坐擁厚賞當卽甘省任內所得因思甘省收捐監糧其中必有私收折色多得平餘情弊且聞向來監糧係各州縣分收而近來則全歸省城卽使多收折色平餘而在部捐者亦未嘗不收平餘若甘省所收平餘較多則捐監者自不樂從何又紛紛向甘肅遠省捐監並稱較部捐便宜其故實不可解若云該省監糧實係收納本色又何能多得盈餘其中情節總未能深悉著傳諭阿桂李侍堯卽將王廷贊因何家道充餘是否卽於捐監一事有染指情弊或別有巧取之處嚴密訪查據實覆奏不可稍涉瞻徇

閏五月癸卯諭本日大學士九卿等會奏定擬勒爾謹情罪一案勒爾謹於逆回爭立新教從未奏聞辦理以致養癰貽患又不能相度機宜速行勦滅擬以斬決自屬咎所應得但其平日居官尙無貪黷枉法款蹟卽辦理此案含糊觀望坐失事機實伊庸弱無能所致而朕委以封疆重任不及早覺察易置實不能不引爲己過勒爾謹著從寬改爲應斬監候秋後處決○丙午熱河志成御製序曰爲各省之志書易爲熱河之志書難彼其以漢人書內地事且各府州縣本有晉乘楚檮杌薈而輯之其易也不待燭照數計而龜卜之也熱河之志則以關外荒略非內地而遼金元之史成於漢人之手所謂如越人視秦人之肥瘠忽然故曰難夫遼金元非若唐宋之興於內地而據有之也又其臣雖有漢人通文墨者非若唐宋之始終一心於其主語言有所不解風尙有所不合且遼金元皆立國不久旋卽遜出則所紀載欲其得中得實蓋亦難矣夫遼金元之史紀內地而欲其得中得實尙且難之况紀邊關以外荒略之地乎其不能得中得實亦益明矣當今之時熱

河之志不可不成者則以本朝荷天之寵百有餘年累洽重熙漢人已數世被覆載生育其語言風尚薰陶漸漬不可以遼金元之漢臣例之亦理之必然况我皇祖建山莊於此地非爲一己豫游實貽萬世之締構而顧可無書以垂永久乎山莊內本有溫泉出而匯武列之水俗遂有熱河之稱茲雖爲府爲縣而仍以熱河稱之者存其朔便於眾也皇祖有詩云聚民至萬家蓋築路之際人煙尙少後乃閭閻日以富耕桑日以闢至於今將百年屹爲都會皇祖雖嘗名之曰避暑山莊序詠三十六景而未輯志者其或有待耶抑亦文獻不足徵而遲遲爲之耶山川里邑建置沿革與夫古蹟人物司事之臣雖摺摭遺逸猶有未備未信者其說具見於前而吾之序是書以行世者正所云在此不在彼○戊申諭軍機大臣等據綽克托奏稱烏什所屬英阿雜爾擬改英阿

西爾牙爾哈喇沙爾擬改哈喇西牙爾等語此等地名理應照依回人語音改正但英阿雜爾哈喇沙爾之名相沿譌錯已久今既據綽克托奏請改正以朕所記憶而論將英阿雜爾改稱英吉沙爾哈喇沙爾改稱喀喇沙爾方與回人原音相合○庚戌上啓
鑾秋獮木蘭○免經過地方本年額賦十分之三○諭軍機大臣等前以甘省番回有掌教及總掌教之名恐易惑眾滋事因傳諭各省督撫留心查革茲據國泰奏稱東省回民均與土著民人比閭而居實屬安靜並無滋事之人亦無掌教及總掌教之名但念經祈福卽爲惑眾之漸嗣後遇有爭控邪教聚眾念經之案卽親提審辦其田土錢債爭控細故亦令赴地方官控理等語本日又詢據袁守侗奏稱直隸通州滄州天津等處回民較多尙皆安靜惟其傳經之人稱爲師父等語回民念經祈福是其習俗相安已

久若槩行禁止恐地方官奉行不善或致騷擾激成事端若有名無實虛應故事又屬無益何必爲此惟其中有借傳經爲煽播邪教者則不可不實力嚴查親提審辦至直隸回民念經之人稱爲師父雖亦如師徒俗稱但究不若並其名而去之向來地方官平日於此等事並不留心查察及奉有諭旨又未免辦理過當不能深喻朕意徒滋胥役得錢放免著再傳諭各督撫務須不動聲色留心妥協查辦毋致吏胥人等藉端滋擾及蹈虛文塞責之習○乙卯諭喀甯阿著賞戴花翎在刑部額外侍郎上行走○丙辰上駐蹕避暑山莊○丁巳諭軍機大臣等前以阿桂覆奏甘肅收捐監糧係王亶望任藩司時懇懇勒爾謹奏請開例且一面奏立規條一面卽公然折色包捐故王亶望得擁貲而去眾人多有如此議論等語因令刑部堂官提訊勒爾謹供稱我從前奏請復捐

監糧時並無折銀之事後來風聞有折色之處因王亶望說並無其事遂信爲實直至王廷贊向我告訴我纔知道又恐各州縣折色收捐不肯買糧王廷贊說不如專交蘭州府承辦大家公議每名定銀五十五兩並稱此項卽從首府分發各州縣並不解司院裏更不經手等語甘省復准捐收監糧原爲邊地倉儲應行充裕是以准行今公然以折色包捐且並未奏明殊干例禁此事旣係王亶望任藩司時懇懇辦理而折色又出伊主意明係伊借此爲分肥入橐之計不可不徹底根究著傳諭楊魁會同陳輝祖卽向王亶望嚴行訊問令其據實供出不得稍存徇隱如果有通同舞弊情事卽將伊拏交刑部治罪見在海塘工程陳輝祖督辦頗爲妥協並不少王亶望一人也至楊魁前曾諭令往福建署理巡撫換富綱來京陛見嗣以福隆安染病或督撫大員內有須更調之

東華錄卷之九十三
處復經傳諭楊魁暫停前往今福隆安病已就痊著諭令楊魁於
審訊王賈望此案完竣仍往福建署理巡撫令富綱來京陛見○
庚申諭熱河自恭建 文廟以來朕每年至山莊之日必卽展誠
祇謁用志景行嗣後仲秋丁祭著照在京 文廟之例派扈從大
學士一員前往行禮以襄大典○軍機大臣奏先經臣等議駁調
任烏什參贊大臣申保奏請伊犁改用普爾錢文今將烏什所鑄
普爾銅斤解往伊犁能否改鑄清錢之處查奏茲據新任參贊大
臣綽克托奏烏什歲獲銅斤悉鑄普爾尙不敷用若停鑄不鑄將
銅運往伊犁必至錢缺價昂官民不便且普爾以一當十每百值
銀一兩若改鑄清錢需八百文作銀一兩亦覺糜費應如所奏烏
什普爾錢文照舊鑄造毋庸將銅運往伊犁改鑄從之○辛酉諭
廣西按察使富躬奏審擬北流縣民陳正仁調戲唐惠志之妻陳

氏賄和後因被村童恥笑追悔抱忿夫婦先後服毒身死經部駁
改仍照府州縣原審問擬自請議處一摺此案原審州縣及委審
各官俱定擬絞候該司以唐陳氏之死事隔一月追悔輕生本夫
唐惠志亦以得錢私和畏罪自盡是唐陳氏彼時原無慙憤輕生
之心與尋常羞忿自盡者有間改依威逼例擬軍辦理本屬有因
並非故爲開脫至向來地方官規避處分一經邀免便思置身局
外今富躬以此案係自行改擬不肯諉過於下請交部嚴加議處
尙有體面至刑部議駁罪名仍照承審府州縣各官原擬乃因案
關二命並非爲調姦致死起見所辦亦無錯誤所有辦理此案之
臬司富躬及原擬各官俱著從寬免其交部從前此等案件凡遇
手足勾引致本婦自盡者俱按例問擬情實秋審時予句其僅止
語言調戲者雖按例定擬俱從寬免句此朕準情酌理期於勿縱

東華錄 卷九十三
勿枉之意今此案雖致死二命但究係和息一月之後若亦定擬絞候情殊可憫如竟照該司改擬充軍則又係致死二命未免稍失之寬陳正仁著改發烏魯木齊充當苦差如此折中辦理庶情法均得其平嗣後遇有此等案件著卽照此問擬著爲令○乙丑諭此次官兵攻得賊匪大卡及所占廟宇相距賊營甚近彼已無險可守且黃河南北岸邊亦俱有官兵接連密布不至有乘間竄逸之處至逆賊如此猖獗我領兵大員官兵等爲所傷折不少必得生擒首逆及其黨惡要犯盡法處治方足以彰國法而儆兇頑第恐賊匪自知無路可逃竟爲自焚自戕之計此雖亦足以完事然究不如生擒之爲更快想阿桂自必設法妥協辦理又諭阿桂等此次派兵攻卡殺賊調度有方阿桂李侍堯著賞給大荷包二對小荷包二對額森特明亮哈當阿進剿受傷仍帶兵轉戰殊爲

奮勇著各賞大荷包一對小荷包二對海蘭察相地進攻甚屬可嘉另賞給玉韞一枚以示優獎

六月丙子予故哈薩克汗阿布賚祭○丁丑敕諭哈薩克瓦利蘇勒坦曰據駐塔爾巴哈台大臣奏爾父阿布賚病故朕聞之不勝軫惜爾前來京瞻覲已受朕恩且係爾父長子素能約束屬下朕所深知除遣大臣賞奠爾父外著加恩承襲爾父汗爵朕君臨天下下一日萬幾爾前入覲時亦已親見當感念朕恩將所屬哈薩克加意約束友愛兄弟輯睦鄰境勿滋事釁勿隱迷人尙謹遵此旨篤誠奮勉以期永受朕恩隨賞大段四端○庚辰諭軍機大臣等據李奉翰奏邳睢黃河南岸魏家莊大隄因水勢盛長全河大溜南趨洶湧異常自閏五月二十七日外灘先行塌去直刷隄身上緊搶護隨築隨塌溜勢日盛水高隄頂人力難施於六月初一日

東華錄 卷之三十三
未時該處隄工漫溢過水約長十餘丈見飭道將先將漫口兩頭裹護卽馳赴該工查明實在情形並飛咨薩載星速來工會同籌辦剋期堵築並自請交部嚴加治罪等語此處漫溢情形既據奏稱水長溜大人力難施該總河所請交部治罪之處轉可從緩惟在督率文武員弁相機籌辦上緊堵築俟合龍後再行覈定功過至見在該處大溜是否尙走正河漫口分掣大溜幾分並著薩載李奉翰迅卽繪圖貼說由驛馳奏以慰廩念再江豫二省黃河自乾隆四十二年開陶莊引河以來連歲衝溢在豫省沙土鬆浮或尙易於衝刷至江南土性堅實何以上年郭家渡甫經漫決此次又有魏家莊之事况上年春閒命阿桂在南河會勘展寬陶莊新河四十丈今春又令在彼會勘因九里岡一帶河中岡沙橫互復於北岸挑挖引河一千餘丈南岸又將沈家壩河身展寬三十丈

近日復據李奉翰奏開放沈家壩引河溜勢甚難放心方爲慰藉何以此次忽又有漫溢之奏况見在清黃交匯所離清口較遠清口得以暢出海口又復深通何以轉致如此從前並非每歲必有水患而自開放陶莊新河以來轉年年不免漫溢朕於此實不能無疑著阿桂薩載李奉翰將南河實在情形是否或因陶莊開放引河致有紆回格礙之處詳晰講求審度據實具奏此朕因河防緊要虛心諮訪阿桂薩載等諒亦必確將實情入告不肯稍存迴護也至見在正屆伏汛雨水較多其豫東二省河防在在俱關緊要並著傳諭韓鏞富勒渾督率員弁實力防護毋稍疏虞○諭額森特從前征勦金川甚屬出力朕是以加恩賞給世襲一等男此次進勦撒拉爾又復奮不顧身致被槍傷深爲可嘉著加恩晉封世襲三等子仍兼在本身○辛巳諭軍機大臣等據昨王廷

贊來至熱河因令軍機大臣會同行在太學士九卿傳旨以私放馬明心子壻及守城獨自居功二條俱從寬不究惟監糧私收折色一事令其據實陳明據王廷贊供到任後原不許折色因無人報捐止得仍如此辦又恐各州縣有短價勒買糧石之事是以定數五十五兩甘省糧價較賤足敷定額又因捐生多在省城改歸首府收捐仍將銀兩發給各州縣買補還倉按季申報並有道府加結等語所供殊不足信甘肅收捐監糧原爲倉儲賑濟起見自應收本色糧石何得公然定數私收折色且從無一字奏聞若云甘省糧賤五十五兩已符定額足敷採買則該處收成自必豐稔何以每年又俱需災賑如災賑屬實糧價必昂則五十五兩之數又斷不敷採買二者均不可解可見所供盡屬支離其中恐有竟不買補虛開賑濟冒銷情弊且捐監一事自應聽本生自行平買

交納糧石何以欲官爲收銀並交首府總辦明係官則折收於前又復冒銷於後兩邊俱得便宜而百姓仍從中受累此事情弊甚大不可不徹底清查此時惟阿桂李侍堯爲中外最能辦事之人且於此事又從未經手毫無迴護著傳諭伊二人卽將此案實在情形詳細查明據實具奏並嚴查有無弊竇將此等情節四面較勘無難水落石出不可稍涉顛預致他日復滋流弊但恐如此徹底一辦合省地方官皆爲有罪之人伊等合成一氣察弊殊非容易然此事終不可不辦想伊二人斷不肯爲他人擔此干係也○壬午予故回部郡王品級貝勒霍集斯祭○丙戌諭軍機大臣等本日阿桂等奏籌辦賊匪情形一摺內稱本月初六日大雨竟夜勢甚霽霽初七初八連縣不止等語甘省向年俱奏報雨少被旱歲需賑恤今阿桂屢奏稱雨勢連縣霽霽且至數日之久是從前

所云常旱之言全係誑捏該省地方官竟有折收監糧一事年年假報旱災冒賑作弊已屬顯然勒爾謹久任總督王廷贊亦久任道府藩司何以從前俱以兩少被旱爲詞豈有今年甘省雨獨多之理著傳諭留京辦事王大臣前赴刑部會同該堂官提出勒爾謹當堂訊問並將王廷贊傳至刑部一併質訊令其據實供吐錄詞具奏並著刑部堂官將王廷贊派員在衙門看守俟阿桂等覆奏到日再降諭旨○丁亥諭軍機大臣等昨已降旨將甘省折收監糧冒賑作弊之事覆行提訊勒爾謹並傳王廷贊到部嚴訊此事折收旣已屬實又復冒銷災賑種種弊端難以枚舉見在阿桂等節次所奏雨水情形與甘省常年被旱之言迥不相符其爲捏飾浮冒開銷監穀更屬無疑王廷贊在蘭州守城時雖有辦理錯誤及獨自攘功之事然朕總念其保全省城功不可沒一槩恕而不究今伊若天良未泯能將甘省歷年如何通同舞弊之處逐款據實供明朕仍不忘其守城之功必加特恩寬宥卽勒爾謹王宜望罪不可追王廷贊尙可以功抵罪若伊竟執迷不悟始終不肯實說則是喪盡天良自取重罪不能復邀寬典矣况此事旣已發覺斷無置而不辦之理卽阿桂李侍堯亦斷不肯代爲隱匿王廷贊若不趁此時供明將來阿桂等查明奏到時又豈能再行狡展乎將此傳諭留京辦事王大臣及刑部堂官向王廷贊面傳諭旨令其同勒爾謹各自詳悉供吐卽行據實具奏並傳諭王廷贊伊之生死總在此番實供與否令伊自定朕不食言○己丑諭軍機大臣等前據陳輝祖奏審訊王宜望私收監糧折色一事未將結報之道府何人逐一供明業經傳旨令其卽行覆訊此事私收折色於前勒買冒銷於後情節已屬顯然卽王宜望亦不虞其始終

東華實錄 卷九十三 四

狡展但楊魁陳輝祖等向其訊問並無證據未必肯據實供吐著傳諭陳輝祖即派妥員將王亶望拏交刑部嚴審並飭沿途小心防護毋致疏虞○諭前以甘省收捐監糧一事明係捏灾冒賑上下一氣通同舞弊不可不徹底嚴查已屢經傳諭阿桂李侍堯將歷任道府何人如何冒銷賑濟如何勒買分肥逐一查明據實參奏阿桂等自必嚴切根究斷不肯爲人代擔干係日內又命留京辦理王大臣會同刑部提訊勒爾謹並傳王廷贊到部質訊並降旨陳輝祖等即將王亶望拏交刑部審訊矣此事既經發覺斷無置而不辦之理阿桂等自必認真查辦令其水落石出不肯稍存諱匿之見至監糧折收之銀大半歸於冒銷賑恤但賑恤一事甘省既向來如此自應治冒銷者之罪不應因有此弊竟因噎廢食將應賑恤者致不賑恤朕愛養黎元每遇各省水旱偏災不惜多

發帑金優恤甯濫毋遺以期不使一夫失所况甘省素稱邊隅瘠瘠尤宜加意撫綏豈可以有冒賑之事遂致貧民或有拮据昔宋臣曾有以薦人不當後有悔意者時程子云願侍郎受百人欺不可使好賢之心稍替爲大臣者尙應如此存心况朕君臨天下保赤情殷亦甯可受萬人之欺不可使視民如傷之念因此稍懈也卽以逆回一事而論蘭州百姓並無從賊之人此實由朕平日子惠邊氓有加無已是以閭閻激發天良不肯附從逆匪豈非仁政之明效大驗耶總之甘省冒賑之弊斷不可不辦而甘省賑恤之事仍不可不行此意著傳諭阿桂李侍堯徧行出示甘省百姓使之家喻戶曉倍深愛戴以仰副朕意○庚寅諭軍機大臣等據薩載等覆奏河工連年漫決之故總由漫溢一次則下游正河淤墊一次以致河底日漸淤高大溜趨向無定實非陶莊引河紆回格

礙所致等語前以陶莊引河開後轉連年有河決之事是以降旨
諮詢今既據奏稱陶莊新河尚屬寬深足以容納且大溜業已徑
行此時亦不能復議改歸故道止可仍存其舊至大河漫溢一次
下游河身卽不免淤高自係情理如此但河工設有隄防原所以
杜其旁溢若有隄而仍復衝決則長此安窮何時可期安軌况豫
省黃河寬衍沙土又復鬆浮或尙可諉之地勢水性非人力所能
抵禦至江南則河身收束土性堅實迥非河南可比何至連歲有
此其爲隄工之不能鞏固可知大約該省河員因連年盛漲漫溢
處分俱邀寬免分賠又止照例以致伊等心存疏懈此皆薩載李
奉翰管束不嚴並不實力稽查所致伊二人卽不能辭咎著傳諭
該督等嗣後務須嚴行督率文武員弁加意整頓防護毋稍懈忽
至見在魏家莊漫口應卽上緊催集料物先行包鑲裏頭其餘以

次堵築迅速合龍○諭原任安徽按察使袁鑒緣事降調但伊久
任江南於該處風土民情尙爲熟悉邗睢見有漫工袁鑒著留南
河交該督等差遣委用遇有應得降補之缺酌量題補○壬辰免
陝西西安等十二府州民欠○癸巳諭阿桂等奏本月十五日令
海蘭察明亮率同乾清門侍衛並侍衛章京等帶領奮勇官兵屯
練降番及阿拉善兵豫備埋伏令海祿等帶兵策應舒亮等各由
本卡進攻乘密雨時出賊不意將板網土袋拋入賊濠我兵勇氣
百倍哈當阿帶領降番首先跳入濠內與賊攪殺並用撓鉤鉤開
土袋板片一面拋擲火彈一面踴身而上勦殺賊眾占得賊濠俱
經拆毀填滿海蘭察明亮又督率官兵遠則槍箭齊發近則短兵
相接各路官兵咸懷振奮分占礮上賊卡海蘭察明亮又擊立木
柵帶兵撲入賊營痛加勦殺拋射火箭火彈將帳房板屋盡行燒

毀奪獲賊人刀矛烏槍無算賊匪退回華林寺死守海蘭察明亮
又逼拏木柵賊人被我兵槍箭擊死甚多除被賊搶去屍身未經
割獲首級外共割得賊人首級一百二十餘顆並首逆蘇四十三
黨惡韓一提巴拉周阿渾張懷德馬黑提卜等首級此外被官兵
殺死及帶傷者三百餘人見止二百餘人退回華林寺死守均不
過殘敗賊黨數日內即可剿戮淨盡等語此次圍剿賊巢海蘭察
明亮屢次率眾爭先攻奪賊卡殲戮甚多實屬首先奮勇出力並
哈當阿著交部從優議敘其餘在事出力之大小各員弁著阿桂
等查明分別等第一體咨部議敘其陣亡之三等侍衛吉爾坦保
著交部照例給與卹典拜唐阿塔克達那並著加恩照藍翎侍衛
例議卹此外受傷各員弁及陣亡被傷之官兵等均著阿桂等查
明照例給與優卹至此次川省降番尤為鼓勇先登內受傷者著

阿桂先行賞賚其餘一槩再行賞給一月錢糧以示獎勵其首逆
蘇四十三首級並著傳示各省俾回民等各知儆戒再阿桂等奏
此次官兵殺死逆黨阿渾五人內查出海朝宗一犯係四月中旬
伍彌泰仁和馬彪公同商酌遣赴賊營曉示解散黨羽被賊留住
卽稱阿渾與首逆同坐議事據實參奏等語伍彌泰等身任將軍
提督均有奏事之責既經遣人赴賊營曉諭又復被留未回何以
並未陳奏直待阿桂等查出甚屬錯謬伍彌泰仁和馬彪俱著交
部嚴加議處又諭此次剿滅撒拉爾賊匪海蘭察甚為奮勉著加
恩將伊子安祿授為三等侍衛以示獎勵○戊戌諭軍機大臣等
據富綱彙奏壽民鄭昌璽婦陳柯氏等俱年逾百歲洵屬熙朝人
瑞盛世嘉祥理合繕摺奏聞等語壽民壽婦年逾百齡為各省常
有之事該撫既經分案具題何必多此一奏其意不過以朕萬壽

節近以此言祥之語入告不知督撫身任封疆全在辦理民事而朕尤以勤政愛民庶事就理爲念如果各省雨水調勻年豐民樂祥瑞孰大於此豈必以景星慶雲鳳凰麒麟侈陳符瑞耶將此傳諭該撫知之

臣等伏以聖訓至明臣等不敢不遵謹將此旨錄傳各該督撫一體遵照欽此

